



南江富 大用 時可編

省官部

# 尚書省

**歷代沿革**

尚書省猶唐虞大麓之職也書納于大麓王肅注云堯納舜於黃顯之官大錄萬幾之政周官司書鄭玄云若今尚書寮

時少府遣吏四人在殿中主發書故謂之尚書尚猶主也有尚書令尚書僕射尚書丞至漢武帝時左右曹諸史分平尚書奏事知樞密者始領尚書事昭帝時霍光以大將軍領尚書事成帝初王鳳以大司馬師丹以左將軍並領尚書事後漢章帝以太傅趙意太尉牟融並錄尚書事尚書有錄名自熹始和帝時太尉鄧彪為太傅錄尚書事位上公在三公上漢制遂以為常每少帝立則置太傅錄尚書事猶古冢宰摠已之義堯輒罷之漢初尚書雖有曹名不以為號及靈帝以侍中梁鵠為

選部於是始有曹名也謂之尚書其亦謂之中書夫事八座連名而有  
不合得建異議一漢皆屬少府魏晉以後亦公卿推重者為之自置中  
書省有監令掌儀衛之任而尚書之權漸減矣宋曰尚書寺居建禮門  
內亦曰尚書省亦謂之內書事梁陳舉國機要悉在中書獻納之任又  
歸門下而尚書但聽命受事而已後魏天興元年置八部大夫於皇城  
四方四維以擬八座謂之八國各有屬官分尚書三十六曹及諸外置  
令大夫主之四年又復尚書三十六曹天賜元年後罷別置武歸修勤  
二職分主省務神龜元年始置僕射左右丞及諸曹尚書十餘人各居  
別寺北齊尚書省亦有錄令僕射總理六尚書事謂之都省亦謂之北  
省後齊北王以太子監國立大都督府與尚書省分理衆事仍開府置  
佐後周無尚書隋高祖時尚書省事無不總置令左太僕射各一人總  
吏部禮部兵部都官度支工部等六曹事是為八座屬官左右丞各一  
人都事八人分司管轄唐制略同尚書省都堂居中央左右分司堂東有  
吏戶禮三行每行四司左司統之西有兵刑工三行每行四司右司統

之凡二十四司分曹共理而天下之事盡矣龍翔二年改尚書省為中  
書省初復舊宅元年改為文昌臺垂拱元年又改為都臺咸通初  
復舊長安三年又改為中書神龍初復為尚書省亦謂之南省宋尚  
書省掌六曹諸司文書施行制命舉省內紀綱程式正御史糾不當者  
聽內外枉屈辨訴凡六曹不能決者總而決之六曹參用古制建尚書  
省總領紀綱儀刑端禁置尚書令左右丞相及平章政事二人任宰相  
之職掌承天子平章萬機其屬有左丞右丞及參知政事二人執政之  
官為宰相之式佐治省事又有左司掌總察吏戶禮三部受事付事右  
司掌總察兵刑工三部受事付事二司各有郎中員外郎都事等員在  
外別置行省

羣書要語

輔位明堂遺象麟閣漢謝朓表尚書職居天官政化之本南  
齊詔尚書百官之本國家樞機六典尚書萬事之本王化所

由宜參貳親賢以康庶政晉穆帝詔天下樞要在於尚書韋彪傳文昌天  
府晉百官表注堯試舜於大麓者領錄天下事如今之尚書宜得大賢乃

可使敷議持平焉桓譚新論陛下之有尚書猶天之有北斗也斗為天佐  
吉尚書為陛下喉舌斗斟酌元氣運乎四時尚書出納王命賦政四海東  
漢李固疏

**詩**尚書北斗尊顏真卿集德履星辰北斗寒三能只隔片雲間周家家  
宰均四海漢制尚書本百官 楊誠齋詩

**古今事實**

都堂居中

唐制尚書省都堂居中左右分司堂東西凡二十四司分曹共理 詳見前  
沿革

制勅用黃

唐高宗時勅曰制勅施行既為永式比用白紙各有虫蠹自今尚書省須  
下諸州縣並用黃紙

百官揔已

太尉鄧彪元勲之族三讓弥高海內歸仁為羣賢首聰明康強可謂光  
入矣其以彪為大傳錄尚書事百官揔已以聽 漢和帝策書

三公絕席

張禹拜大傳錄尚書鄧太后以薨帝初育欲令重臣居禁內乃詔禹舍官  
中給帷帳牀褥太官朝夕進食五日一歸府每朝贊與三公絕席

謹慎周密

前漢張安世拜大司馬車騎將軍領尚書事職典樞機以謹慎周密自著  
外內無間嘗有所薦其人來謝安世以為舉賢建能豈有私謝邪絕弗復  
通有即功高不調自言安世應曰君之功高明主所知人臣執事何長短  
而自言乎絕不許已而即果遷又莫府長史遷辭去之官安世問以過失  
長史曰將軍為明主股肱而士無所進論者以為譏安世曰明主在上賢  
不肖較然臣下自脩而已何知士而薦之其匿名迹遠摧執如此 本傳

中正弘遠

晉元康元年詔司徒王渾秉德中正識量弘遠歷位內外文武勲庸著在  
方策宜參弼機衡以亮天工其令錄尚書事 習書

三人參錄

太尉趙峻二世掌典機衡有匪石不貳之心大司農李固公侯之苗忠直不阿有史魚之風今以峻為太傅固為太尉與大將軍共參錄尚書事

東西二錄

晉宗室會稽王道子進位丞相錄尚書假節都督中外諸軍事勢傾天下道子世子元顯又加錄尚書事道子政無大小一委元顯時謂道子為東錄元顯為西錄

典職六年

章帝詔曰司空牟融典職六年勤勞不怠其以牟融為太尉錄尚書事

典樞十年

孔光領尚書事凡典樞機十餘年守法度修政事不希旨苟合

志誅曹節

竇后臨朝以陳蕃為太傅錄尚書事蕃與后父大將軍竇武同心盡力微用名賢共參政事志誅常侍曹節等以其譎事太后多行貪虐天下之士

莫不延頸想望太平及事泄曹節矯詔誅武等蕃遂見害

恥為魏臣

魏楊彪為太尉錄尚書事及李傕郭汜之亂彪及節為主崎嶇危難之間幾不免於害見漢符命將終自以累世為三公恥為魏臣遂稱足變不復行積十餘年魏文帝即王位欲以為太尉令近臣宣旨彪辭曰嘗以漢朝為三公值危亂不能立尺寸之益若復為魏臣於國之選亦不為榮也帝不奪其意

劔履上殿

汝南文成王亮為太宰錄尚書事入朝不趨劔履上殿增掾屬十人與太保衛瓘對掌朝政

贊拜不名

晉泰和元年詔會稽王朕承洪緒乃聞善誘慎徽五教儀形具瞻其以日立為丞相錄尚書事入朝不趨讚拜不名劔履上殿給羽葆鼓吹班劔六十人

暴風拔木

北海王祥初遷大將軍錄尚書事祥也拜命其夜有暴風震電拔木倒立識者知其不終後魏書

天火示災

東晉元興元年舍下火是時指言用事出鎮姑熟名雖在外實遙錄尚書故天火示不復用也徽祥記

古今文集

雜著

尚書省謝車駕臨幸表

林希

天臺肇建具崇疾舌之司帝車下臨增重陛廉之寄非常之舉視古無偏恭惟 皇帝陛下天縱多能日新盛德剷除衆弊裁制萬微考先王之董治官立尚書以為政本紀綱條理見微旨於新書勅作規模別攸司於著位蓋慮之積年而成於茲日聞諸前世而驗於方今忽紆清蹕之傳采葦葦鴻都之觀且北辰居極外環象斗之官而黃道所經旁及積星之位瞻威顯於咫尺被法語之丁寧敷以在公退而交傲分曹即屬燦然周典之文望輦拜恩陋彼漢郎之嘆矧復宗藩依進禁從相趨凡獲侍於宸筵皆預窺於聖作歡聲載溢慶榮遇於一時信史備書流美談於萬世臣等叨膺重任久負明恩顧讓備位之歎榮劇逢辰之幸敢忘策勵期稱寵臨

尚書日令

歷代沿革

秦置令丞屬少府漢因之武昭之後其任稍重宣帝時任中尚書官元帝時弘恭石顯相繼為中書令元帝被疾不親政

事遂委任焉及蕭望之領尚書事知顯專權建言以為尚書百官之本國家樞機宜以通明公正處之武帝遊宴後庭始用宦者非古制請罷中尚書中書與尚書奏事故連言之及光武親總吏職推歸尚書三公

但受成事而已自魏至晉宋齊秩皆千石品並第三梁加秩中二千石

班第十六陳加品至第一後魏北齊及隋品皆第二唐因之太宗初為

秦王署尚書令其後入臣莫敢為遂廢其官其國政樞密皆委中書至

代宗以親賢有大勳遂特拜尚書令五代梁開平三年詔亦尚書令為正一品宋朝因之大元尚書令一人正一品

**羣書要語**

摠百官之得失管王政之開塞者端右之職也晉書國家司摠括百揆憲範王猷式是群辟故必簡德而拔量才而受謝

石疏百揆之首摠參機衡出納朝政治績之所由也晉起君注龍納大麓

七政以齊內成外平風雨不迷補我袞闕闡我王猷王猷允塞四海咸休

雖聖雖明必賴良才无曰我智官不能任發言如絲其出如綸千里之應

振機在身堊虞尚書議平原帶地資緒極天王或謝開封尚書令表揚職

萬機摠任百揆權衡庶物準的羣僚可以助日月之光華增天地之高厚

北齊邢子才謝表尚書掌出納王命敷奏萬機令摠統之隋百官志天府

文昌萬方之數天官家宰無所不統禮尊三獨事摠百揆江摠讓表背之

家司今日端揆同上司會治本家宰朝端指紳所屬儀刑攸在同上八座

比於文昌二丞方於管轄苟非稱職竊位興譏刘自和北斗為天之喉舌

尚書陛下之喉舌李固疏八座之宰百揆之首白帖

**古今事實**

端揆官漢光武親總吏職天下事皆上尚書與人主參決乃下三府尚書令為端

撰之官

**三獨坐**

後漢尚書令主贊奏事摠領紀綱無所不統與司隸校尉御史中丞朝會

皆專席而坐京師號曰三獨坐

**能識亡書**

前漢張安世以父任為郎天子行幸河東嘗亡書三篋詔問莫能知唯安

**明習故事**

世識之後購求得書以相授無所遺失奇其材擢為尚書令

漢侯霸字君房光武徵霸與車駕會壽昌拜尚書令時無典故朝廷又少

舊臣霸明習故事收錄遺文條奏無遺世養政法度有益於時者皆施行之

○漢黃瓊字世英遷尚書令明習故事號為富贍

直言無撓

漢申屠剛為尚書令嘗言上為直言無所在撓

駁議人意

後漢宋約為尚書令忠正直言數納策謀每駁議未嘗不合上意本傳

臺閣舊習

漢黃香遷僕射月餘為尚書令增秩二千石上惜其幹用臺閣舊習遂見尊重香亦勤力愛公畏慎周密每月奏議所建書案見流布

宮闕故事

陳忠為尚書令數進忠言辭旨弘麗前後所奏悉條於宮闕為故事

言旨切直

任防為尚書令戒典振機竭忠於國數條便宜裁刺時政以補闕失言旨切直

清儉履道

晉太熙元年詔曰夫揔百揆之得失管王政之開塞者端右之職也自漢以來每選此官常慎其人議郎王戎清儉履道庸勲著十已試其以戎為尚書令

頭輶輿輪

後漢申屠剛遷尚書令光武嘗欲出遊剛以隴蜀未平不宜宴安逸豫諫不見聽遂以頭輶乘輿輪遂止

諫回帝車

陳矯為尚書令明帝幸至尚書門矯問曰陛下欲何之帝曰欲案行文書尔矯曰此臣職分非陛下所宜臨若不称職則請就黜帝慙回車

不接賓客

陳蕃為豫章太守性方峻不接賓客徵為尚書令送者不出郭門

不阿豪勢

楊惟拜尚書令平心正直選奉高妙進善嫉惡不阿豪勢

皆慎選舉

左雄為尚書令限年四十九先試經然後奉孝廉故雄為令在位者各肅



清時稱曰左伯豪為尚書天下皆慎選舉

每擢英俊

衛良拜尚書令每當選舉拔擢天下英俊及二千石長吏功次者用之

剪邪截曲

劉祐拜尚書令正身機密剪邪截曲不撓在臣

旌賢退惡

羊陟拜尚書令明審選舉旌賢退惡

治身无嫌

唐約字仲謙拜尚書令自典樞機數有直言美策以補察主上每作表疏

皆手自書之處官任取不言貨利之事當公法不阿所私京師號曰治身

无嫌唐仲謙

厥德仁明

郭賀字喬卿為尚書令百姓歌之曰厥德仁明郭喬卿忠正朝廷上下平

號為清能

呂文字季陽代董允為尚書令庶事無留門無停宿又歷職內外治身儉

約為政不煩號為清能然持法刻深外用俗吏故声名損於郡縣特

為世名公

晉裴秀為尚書令創制朝儀廣陳刑政朝廷多遵用之以為故事在位四

載為當世名公

二令君美

荀彧守尚書令課試令史以下覈其才能有闕於文法不能決疑處事者

即特遣出帝嘗謂曰魏武帝言荀文若之進善不進不止荀公達之退惡

不退不休二令君之美亦望於君也

三日猶香

荀彧為尚書令持節特士坐不累席其在臺閣不以私意撓公刘季和嘗

曰荀令召至人家坐處三日香

焚毀故案

魏荀彧為尚書令嘗以書陳事臨薨皆焚毀故案奇策密謀不得及聞非

正道不用名重天下莫不以為儀表海內英俊咸宗焉

停滯庶事

蜀費禕字文偉代蔣琬為尚書令時戰國多事衆務煩猥禕識寤過人每省讀書記卒目暫視已究其意旨其速數倍於人終亦不忘當以朝晡聽事其間接納賓客嬉戲博奕每盡人之歡事亦不廢重允代禕為尚書令旬日之間事多停滯允乃嘆曰人才力相懸若此非吾所及

飛白題壁

宋玉僧虔為尚書令為飛白書題尚書壁曰圓行方止物之定質修之不巳則溢高之不巳則躓引之不巳則遺是故去之宜疾賞時嗟賞以比座右銘

高蟬趨帳

梁何敬容為尚書令專預機密後以罪免職復為金紫光祿大夫未拜又加侍中敬容舊時賓客門生喧譁如昔會稽謝郁致書戒之曰昔君侯納言加首鳴玉在腰回豐貂以步天昌聳高蟬而趨武帳不以此時薦才拔士少報聖王之恩今人猶有踵君侯之門者本必皆感惠懷仁與君侯之復用也君侯宜杜門念失无有所通

賜劍書名

鄧壽為尚書令壽為僕射章帝賜諸尚書劍惟壽等二人手自著姓名尚書令韓稜楚龍淵僕射鄧壽

乘車就席

齊謝朓徵為司徒尚書令朓辭脚疾不堪謁仍角巾自輿詣雲龍門既見乘小車就席

儀躄王立

山濤啓事尚書令李胤于處缺宜得其人征南將軍羊祜躄儀王立可以整肅朝廷

尖頭筆公

後魏古弼為尚書令太武大閱將校獵於河西弼留守詔以肥馬給騎人弼命給弱者太武大怒曰尖頭奴敢裁量朕也還臺先斬此奴弼頭尖太

武常名之曰筆頭時人呼為筆公屬官惶怖懼誅弼告之曰吾謂事君使田獵不過盤遊其罪小也不備不虞使我寇恣逸其罪大也今北狄孔熾南虜未滅狡馬之志窺伺邊境是吾憂也故選肥馬備軍實為不虞之慮苟使國家有利吾寧避死乎太武聞而嘆曰有臣如此國之寶也

### 何為復讓

晉王述每得官無所辭為尚書令子坦之勸讓述曰汝言我不堪邪坦曰非也但克讓自是美事耳述曰既云堪何為復讓

### 復表不受

唐代宗以郭子儀為尚書令子儀讓以太宗昔居此官累聖相承曠而不置詔不允勅令宰相百官於尚書省送上子儀復表讓不受

### 空函忤意

桓溫素忌殷浩因其北征軍敗乃上疏請擯浩於菴齋寬坐發為無人後溫復欲以浩為尚書令遺書告之浩欣然許之將表書慮有謬誤開閉者數十竟遺空函大忤溫意由是遂絕

### 書名見嘲

何敬容為尚書令貪倖為時所嗤鄙其書名敬字則大作苟小為文容字則大為文小為口陸陞戲之曰公家苟既奇大父亦不小敬容遂不能答又為漏禁中語故嘲諷日至當有客姓吉敬容問卿與郎吉遠近客答曰如明公之與蕭何

### 古今文集

雜著

### 除呂蒙正尚書僕射制

邦國政治蓋出於中樞朝廷紀綱盡歸於會府矧乃端揆之任聿居師長之崇苟非台鉉之賢曷慰搢紳之望具官呂蒙正挺生英氣符合昌期目光華卜之求遂倚塩梅之寄謨明匪懈亮直不渝爰自天官再持政柄洎和鼎實時維老成朕欽若丕圖建用皇極雖弥綸大猷固未協於康哉而勵翼小心亦備觀於勤止頗禱隆年之望宜均勞逸之功長是中臺式茲百辟

行尚書省

見後行省

新編古今事文類聚新集卷之四

新編古今事文類聚新集卷之五

都省部

南江富

大可

時可編

中書省

歷代沿革

**魏**黃初初改秘書省為中書省武帝以秘書并中書省南齊

管司王言及司進御之音樂并司伶官又領舍人省掌署勅行下宣旨

勞問省內史省監令各一人煬帝大業十二年改內史省為中書省唐

武德三年改內書省曰中書省龍朔元年改曰西臺光宅元年改中書

省曰鳳閣開元元年改中書省曰紫微省時謂尚書省為南省門下中

中書省為右省或宋中書省掌進擬庶務宣奉命令除授省臺寺監長貳

通謂之兩省館閣帶職提舉官已上臺諫章奏臣僚陳請具革廢置及內外取旨之

事又有尚書省門下省謂之三省大元初有尚書省續以中書省為都

省有中書令右丞相左丞相平章重事平章政事右丞左丞參知政事  
簽書省事斷事官左右司郎中負外郎都事管勾承發司照磨經歷知  
事管勾在外又置行中書省至元二十四年復改為尚書省

**古今事實**

有瑞柳樹

呂渭授禮部侍郎中書省有柳樹建中末枯死貞元元年車駕還京後其  
樹再榮人謂之瑞柳樹渭試進士取瑞柳為題上聞而嘉之

謂鳳凰池

中書省地在樞近多承寵任是以人固其位謂之鳳凰池通典

為東西臺

治平二年祖无擇言門下中書與尚書三省其長官皆宰相之任今乃左  
省在西右省在東不可乞將中書省與門下省對移唐龍朔中嘗改左右  
省為東西臺

曰左右曹

漢應劭官儀曰左右曹受尚書事前世文士以中書在右因謂中書為右  
曹又稱西掖

**古今文集**

古詩

贈徐幹詩

誰謂相去遠隔此西掖垣拘限清切禁中情无由宣

直中書省詩

謝玄暉

紫殿肅陰飈彤庭赫弘敞夙動萬年枝日華承露掌玲瓏結綺錢深沈映  
珠網紅藥當階翻蒼苔依砌上茲言翔鳳池鳴佩多清響信美非吾室中  
園思偃仰明情已鬱陶春物方駘蕩安得凌風翰聊恣山泉賞

中書即詩

卞伯玉

大方信包含優渥遂不已羅鱗龍鳳池揮翰紫宸裏

行省

歷代沿革

有魏晉有之謂之行臺魏末晉文帝時諸葛誕散騎常侍裴秀尚書僕射陳泰黃門侍郎鍾會以行臺從晉永嘉四年東海王越帥衆許昌以行臺自隨後魏亦置行臺孝武永熙三年罷諸行臺尋詔復以渤海王高歡為大行臺隨機裁處後齊亦皆隨權制而置負馬晉置行臺省有尚書令僕射都事侍郎等負蓋隨其所管之道置於外州謂之行臺尚書省唐武德初以諸道軍務事繁分置行臺尚書省貞觀以後廢後諸道只各置採訪等使兼判尚書事蓋行臺之遺制也宋無行臺省大元外道置行省有左右丞參政僉行省斷事官同僉省咨議郎中負外郎都事照磨管勾

羣書要語

臣維將士鎮撫疆場儲積器用受活黎民隱若敵國類氏家訓張道携為晉州行臺左丞

古今事實

理邊民寬

北齊武定八年辛術為東南道行臺東徐州刺史鄒志殺郡守文宣聞之

勅術曰江淮初附百姓難向京師留鄉為行臺欲理邊民寬枉監理牧守自今以後所統十餘州地諸有犯法刺史先啓聽報以下先理後表齊代行臺兼總民事自術始也

有王佐才

北史蘇綽為周文帝行臺郎中在官歲餘未見知其臺中咸稱其能僕射周慧達稱其有王佐才時文帝與公卿往昆明池觀魚至漢故蒼池顧問左右莫有知者或曰蘇綽博物乃召問綽應對如流文帝嘉之乃令綽並馬至池及夜還留綽問以政道卧而聽之文帝乃起整衣冠危坐不竟際之前帝語遂達曙詰朝謂周惠達曰蘇綽真奇士也即拜大行臺左丞參典機密自是寵遇日隆

辦槽解圍

獨孤永業後主時為河陽道行臺僕射落州刺史周武帝親攻金墉永業出兵禦之曰是何達官作何行動周人曰至尊自來主人何不出看客永業曰客行忽速是故不出乃連夜辦馬槽二千周人聞之以為大將軍至

乃解圍去

備艇全橋

北齊張亮為行臺左丞高仲密之叛也與斛律金守河陽周太祖於上流放火船燒河橋亮乃備小艇百餘艘皆載長鑠上頭施鉤火船將至即馳小艇以鈎上之分鑠向岸船不得及橋之獲全亮之力也

專制河南

侯景為南道大行臺位司徒言於神武曰恨不得兵三萬橫行天下要須濟江縛取蕭衍老翁以作太平寺主神武壯其言使擁兵十萬專制河南伏任若已之半軀

拜鎮東都

屈突通判陝東道行臺左僕射時從討王世充世充平論功第一拜陝東道大行臺右僕射鎮東都

中書令

歷代沿革

**周**官內史掌王之八柄掌書王命蓋其任也漢有中書謁者令丞屬少府自武帝遊宴後廷始用宦者典事尚書謂之中書謁者置令僕射司馬迂被腐刑之後為中書令即其任也宣帝任中尚書官皆宦者為令僕射元帝亦以宦者為中書令謂中人為无外黨遂委以政事上无大小皆决之成帝改中書謁者令曰中謁者令罷中書宦者更以士人為之**後漢**省獻帝時魏武為魏王置秘書令典尚書奏事此又中書之任也魏**黃初**上置中書令為秘書改令為監典尚書奏事又置監與令各一人秩並千石而中書典尚書奏事若密詔下州郡及邊將則不由尚書權自此重矣晉監令並第三品掌贊詔命記會時事典作文書舊尚書并掌詔奏故有中書官而詔悉由中書也東晉更重其職多以諸公領之中興之後以中書之任併入散騎省後復置之**宋**亦置監令梁中書監令並增秩至二千石陳因之以中書分為二十一局各掌尚書諸曹總國機要而尚書唯聽受而已後魏置監令各一人監為正一品令為正二品北齊依魏後周依周官春官府置內

史中大夫二人掌王言蓋比中書監令之任後又增為上大夫文帝廢三公府僚令中書令與侍中知政事遂為宰相之職煬帝十二年改為內書省唐武德初為內史省龍朔二年改令為右相光宅二年改內史開元初改紫微令宋中書令正一品以檢校官兼中書令謂之使相國初未定官制前異姓未有兼中書令者惟贈官有之太祖太宗時加中書令者惟趙普一人大元中書省有中書令為宰相之職掌承天子平章萬機

**羣書要語**

掌軍國之政令緝熙帝載統和天人入則告之出則奉之以唐六典璧門職掌詔命王獻天達鳳沼神深絲綸王言出納帝命宋謝莊中書令表

**古今事類**

銅印軺車

晉制中書令銅印墨綬進賢兩梁冠絳朝服佩水蒼玉乘軺車

鳳閣鸞臺

自隋唐以來除改百官必有誥勅而其制蓋須申中書門下省故劉樹之云不經鳳閣鸞臺何謂之勅

尊寵任職

前漢司馬遷既被腐刑之後為中書令尊寵任職

賢明選士

蕭望之以中書政事宜以賢明之選自武帝遂宴後庭故用宦者非因舊又違古不近刑人之義而欲更置士人

朝端稱宜

太寧初蕭祖詔温嶠曰卿既以令望忠允之懷著於周旋且文清而旨遠宜居深密令欲卿以為中書令朝端咸稱以為宜

貴倖傾朝

石君防與弘恭皆少年高刑為黃門以選為中尚書宣帝時任中書官以恭為令君防為僕射恭死君防為令貴倖傾朝



中書並掌

魏黃初中改秘書為中書以劉放為監孫資為令遂並掌機密歷文明齊王三世

中書專任

齊濟字子通時中書監令號為專任濟上疏曰大臣太重者國危左右太親者身弊古之至戒也往者大臣秉政外內扇動陛下卓然自覽萬機莫不祇肅夫人臣匪不忠也然威權在下則衆心慢上勢之常也陛下既已察之於大臣願无忘於左右

中書五郎

晉諸公讚陳准為中書令張華為監與華俱處機密而推崇之每至直詔書無小大先示華了方措意華得詔書不復示准者省中號准為中書五郎其從容如此

中書令公

高允為中書令魏文帝重之不名呼為令公

同車異車

晉記初中書令常同車入朝及和嶠為令首勗為監嶠意高抗專車而坐乃使監令異車自此始

大令小令

晉陽秋中書王猷之卒以王珉為中書令世稱大王令小王令珉父洽未和中為中書令至此珉復紹父人以為奕世令聞

可謂清官

晉王延之代張縉為中書令何偃嘆曰晉以子者李琰為此職今以延之代緒為之可謂清官後接之者實為未易

曰真忠臣

高允為中書令高宗禮敬甚重晨入暮出或積日居中朝臣莫知所論或有上書言得失者高宗省而謂群臣曰君父一也父有是非子何為不作書而諫之使人知惡而家內隱處也豈有以父親恐惡而彰於外也今國家善惡不能面陳而上表顯諫此豈不彰君之短明已之美至如高允者

真忠臣也

將授清顯

晉王洽為中書令年二十九將授之從兄胡之遺書曰弟今二十九便居清顯要任敢不敬以先為弟啟義讓之路焉若年至四五十之間雖復起登公輔亦非吾所豫况降此還者耶洽遂不拜

宜處機近

王珉傳詔曰新除侍中珉才學廣贍理識清通宜處機近以參時務其以珉為長兼中書令

親幸草屋

高允拜中書令司徒陸麗曰高允雖蒙寵待而妻子不粒高宗是日幸允第草屋數間布被緼袍高宗歎息久之曰古人之清豈有如此即賜帛五百疋北史

召付紙筆

徐光初有文才年十三王陽攻頰丘掠光令抹馬光但書柱作詩賦左右以白石勸勸令召光付紙筆光立作頌賜衣服遷中書令後趙錄

啓乞授子

晉諸公贊華廙為中書監時多事不泄啓世祖乞授子蒼蒼詔先時荀勗為中書監疾風復使息暢書啓事皆前後相承以子弟管之

表乞除監

王道表曰臣表乞得中書監持節專一所司端誠保傳惟力是視有詔曰昔荀公曾徙中書監為尚書令人賀之乃發恚曰奪我鳳凰池卿諸人賀我耶願足下處之勿疑

宰相參領

王獻之為中書令啓瑯琊王為中書監表曰中書職掌詔命非輕才所能獨任自晉建國常命宰相參領中具以來益重其任故能王言彌徽德音四塞者也

內樞兼管

宋泰始起居注王言之職總司清要中將軍丹陽尹王景文夙尚弘簡情

度淹粹忠規茂績寶資國道宜兼管內樞以重其任

平和有文

吳志胡冲平和有文幹天紀中為中書令

言語辨捷

張尚有俊才孫皓時為侍郎以言語辨捷見知擢為侍中中書令

風儀秀逸

後魏任城王澄為中書令蕭順使使華來見澄音韻道雅風儀秀逸謂主客郎中張尋曰往魏任城以武著今以文見美也

進止詳華

唐温彦博遷中書令突厥降詔議所以安邊者彦博請如漢置降匈奴五原塞以為捍蔽與魏證廷爭徵不勝其辨天子卒從之其後突厥可汗弟結社謀反帝始悔云彦博善辭令每問四方風臚傳誥命若成誦然進止詳華人皆拭目觀高祖嘗宴所臣遣秦王諭旨既而顧左右曰何如温彦博

若失一臂

薛叔子元超拜中書令兼左庶子帝幸東都留輔太子監國手勅曰朕留卿若失一臂顧太子未習庶務關中事卿悉專之

為第一功

房元齡太宗即位為中書令第功班賞第一與杜如晦長孫无忌尉遲敬德侯君集功第一

執政事筆

裴炎輔太子是為中宗政中書令舊宰相議事門下省號政事堂長孫无忌以司空房元齡以僕射魏証以太子太師皆知門下省事至炎以中書令執政事筆故徙政事堂於中書省

介奸黨間

蕭至忠為中書令時宗楚客懷奸植黨而韋巨源楊再思李嶠務自安无所弼正至忠介其間獨不詭隨時望氣然歸重帝亦曰宰相中至忠最怜我

父子相失

崔湜拜中書令時父挹以吏部尚書得謝而性貪數為人請託以干湜湜多不從由是父子相失玄宗在東宮數幸其第申款密

妻子不粒見前親幸草屋注

二貪相逼

初嘉貞在兵部而張說已為侍郎及皆相說位在其下議論无所讓故說不平未幾嘉祐拜金吾將軍兄弟要近人頗憚媚帝幸太原嘉貞以職聞說誅嘉貞素服待罪不謁遂出為幽州刺史說代其處嘉貞銜悔謂人曰中書令幸二貪何相遇如此

四俊見稱

嘉貞性簡疏與人不疑所薦中書舍人苗延嗣呂太一考功員外郎員嘉靜殿中侍御史崔訓皆位清要日與議政事故當時稱曰令君四俊苗呂崔員

倡封禪議

張說進中書舍人倡封禪議受詔與諸儒章儀多所裁旨

撰封禪頌

東封還為尚書右丞兼中書令詔說撰封禪壇頌刻之太山以夸成功初原乾曜不欲封禪說固請乃不相平及升山執事官當從者說皆引所享超階五品從兵惟加勳而不賜衆怨其專

屏風隔坐

紀騰景皇時為中書令騰父亮為尚書令每朝會語以屏風隔坐

殿前再拜

太安元年有胡人入雲龍門殿前再拜曰我當依中書監令付都虞候治之

創綠野堂

裴度徙東都留守加中書令時闡豎擅威天子擁虛器縉紳道喪度不復有經濟意乃治第東都集賢坐鑿山穿池竹木叢萃有風亭水榭梯橋架閣又於午橋創別墅花木萬株中起涼臺署館號綠野堂與白居易劉禹

錫為文章把酒窮晝夜相歡不問人間事而帝知度年雖及而精神不衰每大臣自洛來必問度安否開成三年以病而還東都真拜中書令

進金鏡錄

張九齡為中書令時天長節百官上壽多獻珍異唯九齡進金鏡錄五卷言前古丹廢之道上賞異之

衣錦晝遊

魏元忠為右僕射兼中書令請歸鄉拜掃特賜錦袍一領銀千兩并給千騎四人充其左右手勅曰衣錦晝遊在乎茲日散金敷惠諒屬斯辰

布衣位相

岑文本始為中書有憂色母問之答曰非勲非舊責重位高所以憂也有來慶者輒曰今日受弔不受賀或勸其營產業文本歎曰吾漢南一布衣徒步入關所望不過祕書郎爾今无汗馬勞以文墨位宰相奉稍已重尚何殖產業耶故口未嘗言家事既任職又賚賜豐饒皆令弟文昭主之

力諫遜位

郝處俊遷中書令帝多疾欲遜位武后處俊諫曰天子治陽道后治陰德陽之與陰各有所主不相奪也况天下者高祖太宗之天下也陛下為子而守之不宜持國以與人

自後缺位

玄宗時宰相蕭嵩加中書令自張說為中書令後缺此位四年嵩得之常帶河東節度使

掌文誥職

張九齡一代詞宗為中書令引韋陟為中書舍人與孫逖梁涉對掌文誥時人以為美談

有刀筆才

吳薛瑩條例吳事曰胡中意性調美心識解暢有刀筆才閑於時事為中書令雖不能匡矯亦自守不能苟求容媚

奪我鳳池

荀勗自中書監為尚書令人賀之乃發恚曰奪我鳳凰池何賀之有

指謂雞樹

劉放孫資共典樞要夏侯獻曹肇心內不平殿中有雞棲樹二人相謂此亦能幾指謂放資也

命傳嚴鼓

太宗車駕征遼中書令岑文本卒帝親臨視撫之流涕其夕帝聞嚴鼓三

索焚表章

馬周為中書令臨終索陳事表章帙手自焚之慨然曰以官案彰君之過求身後之名吾弗為也

身為安危

郭子儀為中書令二十四考以身為天下安危

請言優劣

唐開元二年紫微令姚崇奏紫微舍人六員每議事請舍人同發狀凡事

有是非理均與奪人心既異所見或殊抑使雷同情有未盡臣以為執見不同者望請別作連本狀同奏若狀語交牙恐煩聖思臣既見官長望於兩狀後畧言二理優劣聽進止則人各盡能官無留事勅曰可

開國舊勳

宋趙普端拱初三入相稱疾上表致仕以普為西京留守河南尹加中書令懇辭再四太宗賜手詔曰開國舊勳惟卿一人而已不同他等毋即固

避

台樞令德

王旦罷相薨翰林李士承旨李淮等奏議曰太尉王旦踐歷台樞將二十載紀律用張方夏威服藹然令德洽于民瞻贈太尉中書令

**古今文集**

雜著

韓通贈中書令制

易姓受命王者所以徇至公臨難不苟人臣所以明大節具官定交霸府

劉敞

委質前朝荷戈共歷於艱貞錫壤迭分於戎律朕以三靈騰祐百姓樂推言念元勳方疇異渥蒼黃遇害良用憮然追升浴鳳之池式表潛龍之舊

新編古今事文類聚新集卷之五

入各盡職官無留事俟曰可

自漢法州郡交不悉勳聖思百期良官身監公  
以湖異海見海務以受同計不盡以公等

新編古今事文類聚新集卷之六

南江富 大用 時可編

都省部

左右丞相

歷代沿革

**黃帝**得六相而天地治**堯**以舜宅百揆**舜**舉八元八愷為十  
**六相****成湯**始置二相伊尹居右仲虺居左**高宗**得傅說爰立

作相置諸左右**周**召公為保周公為師相成王為左右**秦**悼武二年始

置丞相官丞奉相助也昭襄始以樗里疾甘茂為左右丞相**漢**高帝初

置一丞相十一年更名相國孝惠高后置左右丞相文帝即位周勃為

右丞相位第一陳平為左丞相位第二勃免平專為丞相武帝用劉屈

釐為左丞相分官屬為兩府虛其右以待四方之選哀帝元壽二年更

名大司徒東京不復置至獻帝建安十三年復置**魏**黃初元年改為司

徒文帝復置中書監令並掌機密自是中書多為樞機之任後置大丞

相第一品又有相國晉罷丞相復司徒永昌元年罷司徒并丞相後或有相國或丞相省置无常而中書監令常管機要多为宰相之任宋孝武以義宣為丞相而司徒府如故齊以丞相為贈官梁罷相國置丞相置司徒陳又置相之位丞相上並為贈官魏晉以來宰相但以他官參掌機密或委知政事无有常官其相國丞相或為贈官或闕不置其真為宰相者不居此官後周置大冢宰其後亦置左右丞相及楊堅為大丞相遂罷左右丞相隋有內史納言是為宰相亦有九官參與焉唐世宰相名充不正初以三省長官中書令侍中尚書令共議朝政此丞相職也其後以太宗嘗為尚書令臣下避不敢居其職由是僕射為尚書省長官與侍中中書令號為宰相品位既崇不欲輕授嘗以他官居宰相而假以他官如同中書門下三品及平章事知政事參知機務參與政事及平章軍國重事之右是也武后龍朔元年改侍中為左相中書令為右相尚書僕射為文昌後復改易宋沿唐制以三公至列曹侍郎同平章事為宰相神宗新官制於三省置侍中中書尚書二令虛而不除以尚書左右僕射兼門下中書侍郎為兩相然中書揆而議之門下審而復之尚書承而行之則是首相不復與朝廷議論矣元祐初司馬公相乃請令三省合班奏事分省治事紹聖以後皆因之時議者謂門下相凡事既同進呈則不應自駁已行之命是省審之職可廢也政和中蔡京以太師摠領三省號公相乃廢尚書令改侍中中書令為左輔右弼亦虛而不除改左右僕射為大宰少宰仍兼兩省侍郎靖康中何文績將拜相乃先乞復太少宰為僕射是正仲當制請更為丞相不從建炎三年呂元直初相議者請併三省為一於是元直解中書侍郎改同中書門下平章事乾道七年十二月詔改尚書左右僕射為左右丞相大元置左右丞相位在尚書令之下平章政事之上

**羣書要語**

於四岳有能奮庸熙帝之載使宅百揆亮采惠疇書舜典納于百揆百揆時叙同上允釐百工庶績咸熙帝曰疇咨若時

登庸同上帝曰臣作朕股肱耳目益稷乃歌曰股肱喜哉元首起哉臯陶拜手稽首乃賡載歌曰元首明哉股肱良哉庶事康哉同上實維阿衡實



左右商王長發帝資予良弼以代予言乃審厥象俾以形旁求于天下  
說築傅岩之野推肖爰立作相置諸左右若濟巨川用汝作舟楫若歲大  
旱用汝作霖雨說命肅王命仲山甫將之邦國若否仲山甫明之烝民  
王命仲山甫式是百辟王躬是保出納王命王之喉舌衮職有闕惟仲山  
甫補之並同上理百官而察萬民平邦國而和天下揚盈川集登明選公  
雜進巧拙紆餘為研卓瑩為傑校短量長惟器是適者宰相之方也韓進  
李解宰相所以代天者也輔贊彌縫而裁諸用使斯人由而不知非明哲  
曷臻是欤唐房杜贊當左輔右弼之寄摠代天典物之名典領百僚陶融  
景化唐代宗大曆二年詔九功不叙咨尔緝熙五品不時咨尔寅亮必廣  
大其志无懈察為公常其道以秉彝裕其体以臨下唐李絳制位愈高而  
士愈戴祿愈厚而人愈懷唐元稹加階制從容鼎位尤贊大猷元冕赤舄  
在帝左右又云推忠道善達四方之志弘往納來成天下之務杜佑碑武  
明七德文洽九歌棟才斯全鼎味以適呂蒙正集宰相者上熙陛下覆燾  
之恩下遂羣生性命之理以正百度以和四時韓文啓黃麻而燮五緯躡

青惟而調四序孔穎達王敬則讓司空表

天方資予人具瞻尔張弘靖制

一氣轉

詩句絳灌歸衡宰右漢鄧炎詩

皇佐揚天惠四時无交兵曹子建

一氣轉

洪鈞杜大厦須異才廊廟非庸器文榮公鼎軸老身幹力健韓文公貴

相山瞻峻清文玉絕瑕同上稷契光虞夏伊呂翼商周南史王儉少有宰相

輔志材館經春瑞氣浮當時曾約相車遊白樂天

平生五色線願補舜衣

裳杜牧早歲天教作霖雨明時帝用補龍山王建上張相公終當持一筆

再入福蒼生劉夢得送令狐相公有官居鼎鼐无地起樓臺魏野上寇萊

公一戰文場拔趙旗便調金鼎佐无為王仁裕上傅相因

玉鼎升黃閣金

章謁紫宸任希古

今朝靜聽丹禁漏尚疑身在玉堂中歐詩但令端委坐

廟堂北狄西戎談笑了坡詩不羞老圃秋容淡且看寒花晚節香韓魏公

詩舜舉十六相身尊道何高杜子美詩

吾愛房與杜魁然真宰輔黃閣三

十年清風一萬古唐皮日休

左轄頌虛位今年得舊儒相門韋氏在經術

漢臣須杜

霖雨思賢佐丹青憶老臣應圖求俊馬驚代得麒麟沙汰江湖

濁調和鼎鼎新杜

十年紫殿掌洪鈞出入三朝一品身文帝寵深陪雉尾

武皇恩厚宴龍津 李德裕詩

古今事實

黃閣朱門

鄭玄云朱門洞塔當陽之正色三公與天子禮秩相亞故黃其閣以示謙不敢斥天子疑是漢舊制也 **又**漢舊儀丞相聽事閣曰黃閣

金印紫綬

漢丞相金印紫綬黃扉黑幡所以異車服於百辟也 **又**丞相七國皆秦官金印紫綬掌丞天子助理萬機 同上 **又**天子之相號為丞相黃金印而尊无敵秩加二千石之上 賈誼新書

柱石之臣

丞相王商國家之柱石臣也其人守正不訛 前元后傳 **又**宰相國家柱石不可不強 吳陸凱傳

棟梁之用

隋大業中高孝基謂之曰公有應變之才當為棟梁之用 **又**宰相之門豫

章栝栢雖小已有棟梁之器 南史陸凱傳

有宰相器

何武初為郡吏時太守何壽知武有宰相器 前本 **又**寇恂明經行修名重朝廷所得秩俸厚施朋友及從吏常曰吾因立大夫以致此可獨享之乎時人歸其長者謂其有宰相器 **又**孟康薦崔琳曰切見司隸崔琳牧守州郡所在而治及為分司萬里肅齊誠台輔之妙器家取之良材 後崔琳傳

有宰相体

後朱浮論吳起與田文論功不及者三朱買臣難公孫弘十策弘不得其一終之田文相魏公孫宰漢誠知宰相自有体也

五龍夾日

狄仁傑蒙耻奮忠以樵大謀引張柬之等卒復唐室功盖一時而人不及知故吕温頌之曰取日虞淵洗光咸池潜授五龍夾日以飛世以為知言 本傳

一柱承天

姚崇與張說有隙崇死謂其子曰我死張說來弔尔以我平日寶玩盡列于前知說屬目即率以獻之就問其求神道碑說得即模刻以示外此人見遲稍緩即悔彼不顧則吾族无隹類矣子如其言說來果屬目称去後即以獻之遂求所為文說許之故其碑曰一柱承天高明之位列四時成歲厚毒之功深後說悔來索則碑已模刻矣說歎曰死姚崇猶能算生張說後諸不行唐紀

論功第一

漢高祖五年論功行封上以蕭何功最盛先封為鄼侯功臣皆曰蕭何未嘗有汗馬之勞徒持文墨議論又論位次皆曰曹參身被七十創攻城畧地功最多宜第一鄂千秋曰曹參野戰畧地之功此特一時之事耳漢與楚相守滎陽數年軍无見粮蕭何轉漕關中給食不乏全關中以待陛下此萬世之功也今雖无參等百數何缺於漢奈何以一旦之功而加萬世之功哉蕭何當第一曹參次之

人物第一

唐李揆同平章事帝曰卿門地人物文孝皆當世第一信朝廷之羽儀乎本傳

一代家臣

蕭何曹參皆起秦刀筆吏祿上未有奇節漢與依日月之末光位冠群公為一代家臣蕭曹本贊

一代偉人

姚狄蘇宋皆一代偉人或三入相再入相未有不久於其事能成令名焉柳氏家李文

漢室伊周

周勃登輔佐正國家難誅諸呂立孝文為漢室伊周前周勃傳

江左夷吾

晋桓彝傳王導為丞相彝見導極談世事還謂周凱曰向見江左管夷吾无復憂矣

蕭曹內魏

近觀漢相高祖開基蕭曹為冠孝宣中與丙魏有聲

丙吉贊

房杜姚宋

唐三百年輔弼者不為少獨前称房杜後称姚宋相繼為相崇善應變成務璟善持正守法二人志操不同然叶心輔佐使賦役寬平刑罰清省百姓富庶唐世賢相前称房杜後称姚宋它人莫得比焉

姚宋贊

蕭曹昼一

蕭何薨曹參聞之告舍人曰趣治行吾且入相使者果召參上代何為相事无所變更遵何之約束百姓歌之曰蕭何為法講若昼一曹參代之守而勿失載其清静民以寧一

本傳

丙魏相濟

漢魏相為相丙吉代之相嚴毅吉能濟以寬同心為政上皆重之

謝安風流

王儉曰江左風流宰相惟有謝安盖自况也

南史

嘉貞風操

初天兵使張嘉貞入朝或告其反按无狀帝令坐告者嘉貞辭曰国之重兵利器皆在邊今告者一不當即罪之恐塞言路天子以為忠且許以相及宋璟罷帝欲果用嘉貞而忘其名詔韋抗曰朕常記其風操今為北方大將張姓而復名因閱表疏遂得其名即為中書侍郎同平章事

本傳

不對錢穀

周勃為右丞相上問勃一歲決獄幾何勃謝曰不知問錢穀一歲出入幾何又謝不知上問陳平曰各有主者上曰君主何事曰宰相者上佐天子理陰陽順四時下遂萬物之宜外鎮四夷諸侯內抚百姓使卿大夫各任其職

王陵傳

不問鬪傷

丙吉出逢羣鬪者死傷橫道吉過之不問前行逢人逐牛上喘吐舌使騎問逐牛行幾里矣掾吏謂前後失問吉曰民間傷京兆尹職當禁捕宰相不親小事非當於道路問也方春牛喘此時氣失節恐有所傷三公典調陰陽取當憂是以問之掾吏乃服以吉為知大体

魏相傳

遜直濟文

太宗定禍亂而房杜不言功王魏善諫而房杜遜以直英衛善兵而房杜濟以文房杜贊

應變守文

姚崇善應變以成天下之務宋璟善守文以待天下之正天所以佐唐使中丹也姚崇贊

同管朝政

如晦與元齡同管朝政引七賢者下不肖咸得其職當時浩然歸望房杜贊不閱訟牒

太宗謂房元齡曰公為僕射當廣朕耳目助訪賢才比閱訟牒日數百豈暇求人哉乃勅細務屬左右丞大閱僕射房元齡傳

丹仆植僵

太宗用元齡如晦於大亂之後紀綱彫弛而能丹仆植僵使號令典刑繁然罔不全雖數百年猶蒙其功然求所以致之之蹟逮不可見房杜贊

獻可替否

唐蘇頌與宋璟同當國相得歡甚璟曰吾與蘇氏父子同為宰相僕射長厚自是國器若獻可替否事至即斷盡公不顧私則今丞相遇之通鑑

不負天子

陸贄為相所言皆拂帝短或規其太過對曰吾上不負天子下不負所事唐本傳

總領眾職

前魏相字弱翁宣帝即位遂為丞相帝始親萬機屬精為治練羣臣核名實而相總領眾職甚称上意本傳

開誠布公

蜀先主即帝位策亮為丞相曰丞相其輔朕之闕助宣重光以照明天下評曰亮之為國也抗百姓示儀軌約官職從權制開誠心布公道可謂識

治之良材諸葛亮傳

同心濟謀

唐杜如晦方為相時天下新定臺閣制度憲物率二人討裁每議事帝所  
如晦長於斷而元齡善謀二人深相知故同心濟謀以佐佑帝故當世語  
良相必曰房杜本傳

憂邊思職

前丙吉代魏相為丞相吉馭吏出見驛騎馳赤白囊馭吏隨至公車知虜  
入雲中吏歸白狀吉召東曹掾邊長吏科瑣條其人詔問虜所入郡邑吉  
具對見謂憂邊思職本傳

薦賢助國

李吉甫執政謂裴均曰比日人物吾憚不及知君精鑒謂我言之均即崖  
略疏三十許人吉甫籍以薦于朝天下稱得人薦賢助國宰相之職也

開閣延賢

公孫弘既相於是起客館開東閣以延賢人一日欽賢館以待大賢次日曰  
翹材館以待大材次日曰接士館以待國士其有德任毗贊佐理陰陽者處  
欽賢之館其有材堪九列將軍中二千石者居翹材之館其一介之善一

方之藝者居接士之館躬自菲薄俸祿皆以給之西京雜記

起家薦人

田蚡以肺腑為相起家薦人或至二千石權移主上本傳

為真宰相

隋高穎有文武之大畧明達政務朝野推服議者以為真宰相本傳又上  
謂魏相真漢相識兵略達時令文中子又王商有威重容貌絕人單于來  
朝商坐未央廷中單于前拜謁商離席與言單于仰視商貌大畏之遷延  
却退天子聞而歎曰真漢相矣

為救時相

唐姚崇在告政事委積元宗謂盧懷謹曰朕以天下事委崇以卿坐鎮雅  
俗耳崇出頃更裁決俱盡願謂齊澣曰余為相可比何人未對崇曰何如  
管晏澣曰管晏之法雖不能施於後猶終其身公所為法隨復更之祇可  
謂救時相崇曰救時相豈易得哉

以春秋相

自公孫弘以春秋之義繩臣下取宰相前食貨志

以明經相

韋賢為丞相少子女成復以明經歷位至宰相故鄒魯諺曰遺子黃金滿  
贏不如教子一經本傳

布衣登相

漢制常以列侯為相唯公孫弘布衣登相位武帝乃封為平津侯其後為  
故事至丞相而封自弘始通典

宗室進相

唐宰相以宗室進者九人林甫幾亡天下李程和柔在位無所發明其餘  
皆以材稱職號為賢宰相唐贊

一日台司

唐王徽為相只一日中書五年二月除昭義節度徽上表乞免詞曰六年  
內署雖叨捧日之榮一日台司未展致君之懇南部新書

一歲至相

唐李訓起流人一歲而至宰相

二暮至相

張鎬起布衣二暮而至宰相

十年至相

李絳十年之間位至宰相

八十為相

張柬之為相年且八十矣

二十三年

房元齡以盛德居相位二十三年

二十四考

郭子儀校中書令二十四考

為兩朝相

隋高頴事文煬兩朝有文武大略執政將二十年朝野推服論者以真宰  
相

再升三入

唐宰相再入者長孫無忌狄仁傑李吉甫三入者劉幽求張延賞鄭畷四入者韋巨源姚元崇韋安石五入者蕭瑀裴度取源又宋璟謝表云再升台座三入冢司

十拜四登

裴度十拜相詔四登師壇除平章事制

父子至相

前漢平雷傳云漢興惟韋平父子至宰相又唐戴胄子至德父子繼為相

兄弟並相

卞粹以清辨兄弟六人並登宰輔世稱卞氏六龍

入如父年

唐李吉甫年五十一出鎮淮南五十四復相今德裕自鎮南外入相一如父之年

八葉皆相

唐蕭瑀傳自瑀逮遇凡八葉皆宰相名德相望與唐盛衰世家之盛古未有也

繼踵皆相

後揚震論延光之間震為上相抗直方以臨權枉先公道而後之名可謂懷王臣之節識所任之躰矣遂累兼載德繼踵宰相信哉先世韋平方之茂矣贊曰揚氏載德乃世社國

九十八族

唐宰相三百六十九人九十八族其盛有如此者

輩行不名

陸贄以才幸天子常以輩行呼而不名

尊任不名

李吉甫還秉政入對延英凡五刻罷帝尊任之官而不名

詔賜堂封

唐源乾曜同紫微黃門平章事帝詔中書門下共食實戶三百堂封自此



始並同上

詔給堂食

唐開平詔丞相尊位而堂樹未給無食錢其今日食萬錢之半續通典

賜白羽扇

張九齡在位因帝賜白羽扇乃獻賦未自況曰苟效用之得所雖殺身而何忘本傳

賜熟釜銘

鍾繇魏國初建拜相國文帝在東宮賜繇五熟釜銘曰於赫有魏作漢藩輔厥相惟鍾實幹心膂靖恭夙夜匪違安敷百僚師師指茲度矩三國志本傳

賜筋表直

宋璟為宰相朝野人心歸美焉時春御宴帝以所用金筋令內臣賜璟雖受所賜莫知其由帝曰非賜汝金蓋賜卿筋以表卿直也開元遺事

賜酒賞言

李吉甫成書天子德憲宗欣然絳曰今日西戎內訌烽燧相接誠陛下焦心求濟時之畧渠使高枕而卧哉帝入謂左右曰絳言骨鯁真宰相也遣使者賜醪醑酒唐李絳傳

拜相沙隄

唐故事凡拜相之後禮絕班行府縣載沙填路自私第至子城東街名曰沙隄

朝會火城

每元日冬至大朝會百官已集而宰相方至珂傘列燭多至數百炬謂以火城宰相火城至則衆皆滅燭以避之李肇國史補

金甌覆名

唐元宗命相皆先御書其名案上會太子入待上奉金甌覆其名而告之曰此宰相名也汝知其誰耶射中賜卮酒肅宗曰非崔琳盧從愿乎上曰然通鑑

紗籠護身

唐文苑英華卷六

唐卜者胡蘆生筮卜甚驗李藩嘗問生生日貴人也在紗籠中李問所由終不復言後有新羅生言宰相真司必潛以紗籠護之恐為異物所擾也唐紀

以銀為信

鄴侯傳代宗欲相泌元載忌之帝不得已出泌約曰後召常以銀為信忽除銀青光祿大夫泌知載敗已且相矣未幾果然

設榻以待

唐制政事堂不接客自元載為相中人傳詔者引升堂置榻待之李峴去即敕吏撤去唐志

去卿失左右手

房元齡為相十五年以權寵隆極累表辭位帝遣吏謂曰遜誠美德也因家相眷賴久一日去卿如亡左右手本傳

去卿如斷一臂

高宗幸洛陽詔薛稷與太子居守上曰朕之留卿若去一日若斷一臂關

西重事悉以委卿本傳

槐枝應相

相国李石河中丞樂有宅庭槐一本抽三枝直堂舍屋脊一枝不及相国同堂兄弟三人曰石曰程皆登宰執惟獨一人歷七鎮使相

槐音入相

唐尚書省南門有古槐垂陰至廣相傳夜深聞絲竹之音省中即有入相者俗謂之音声木見因話錄

焚香擇相

唐廢帝欲擇宰相問於左右皆言盧文紀及姚顛有人望廢帝因悉書清望官內琉璃瓶中夜焚香祝天以筋挾之首得文紀欣然相之五代史

經函龍骨

僕射裴遵慶母皇甫氏少時常持經經函中有小珊瑚樹異時忽有小龍骨一具立於側時人以為裴氏祥上元中遵慶遂居宰輔云廣異記

宰相金榜

崔昭暴死復生云見冥間列榜備書人間姓名將相列金榜其次列銀榜州縣並列長鐵榜曉之唐書

### 夢神授筆

五代唐末帝時馬裔孫赴闕宿瀛州其地有神祠夜夢神手授二筆及為翰林李士裔孫以為契夢筆之兆洎入中書上事堂吏奉二筆如夢中所授者太平廣記

### 夢錦半臂

正元中相國竇參為御史中丞嘗一夕夢德宗召對於便殿以錦半臂賜之默念曰臂者庇也大邑所以庇吾身也今夢半臂者豈上以其叨居顯位將給半祿俾我致政乎客有解曰半臂者被股肱之衣也今公夢天子賜之豈非上將以股肱之位而委公乎明日果拜中書侍郎平章事出宣帝志

### 夢金字牌

唐杜相鵬奉父夢有所之見一太牌云是宰相碑也已作者金填其字未作者列名于上杜問曰有杜家兒否曰有任自看之記得姓下其為偏傍曳脚而忘其字乃名鵬舉鵬舉生鴻漸而名字亦前定矣嘉話錄

### 一言寤主

漢田千秋無他材能術業特以一言寤主旬月取宰相世未有也

### 十事要君

姚崇以十事要說天子而後輔政願不偉哉姚崇傳贊

### 懷慎伴食

唐懷慎開元中遷黃門監與紫微令姚崇對掌機密懷慎自以吏道不及崇每事皆推讓之時人謂才伴食宰相

### 味道模稜

蘇味道前後居相位數年不能有所發明依違其間苟度取容而已嘗謂人曰處事不欲決斷明白若有錯誤必貽咎譴但模稜以待兩端可矣時人由是號為蘇模稜

### 立本丹青

立本丹青

唐閻立本既輔政但以俗材應務無宰相器姜恪以戰功擢左相時人有語左相宣威沙漠右相馳譽丹青

### 妄男千秋

武帝征和三年以車千秋為丞相千秋無材能多術又無闕閔功勞特以一言寤意旬月取宰相世未有也後漢使至匈奴單于怪而問之曰聞漢初拜丞相以何用得之使者以上書言事故單于曰者如是非用賢也妄一男子上書即得之矣本傳

### 歇後鄭五

鄭祭每以詩誼託諷中人有誦之天子前者昭宗意其有所蘊未盡因有司上班簿署其側曰可禮部侍郎同中書門下平章事祭本善詩其語多俳故使落調世共號鄭五歇後休至是省史走其家上謁祭笑曰諸君恨矣人皆不識字宰相亦不及我史言不妄俄聞制詔下歎曰萬一然笑殺天下人既視事宗戚詣慶搔首曰歇後鄭五作宰相事可知矣固讓不聽立朝侃然無復故態

### 指鹿為馬

李斯既死趙高為丞相事无大小輒決於高上欲為亂恐群臣不聽乃先設驗持鹿獻二世曰馬也二世笑曰丞相設邪謂鹿為馬問左右左右或默或言馬以阿順趙高或言鹿者高因陰中以法後群臣皆畏趙高遂有望夷之禍

### 牽犬逐兔

秦用李斯之計二十餘年竟并天下尊秦王為皇帝以斯為丞相及二世即位聽趙高之請使高按斯下獄榜掠千餘不勝痛自誣服斯自負於國有功實無反心乃從獄中上書趙高使吏棄去弗奏於是具斯五刑論腰斬咸陽市斯出獄與其中子俱執頭謂子曰吾與汝復牽黃犬俱出上蔡東門逐狡兔可得乎父子相哭而夷三族

### 味道春雪

唐武后時三月大雨雪蘇味道以為瑞率群臣入賀王求禮曰宰相調燮陰陽而季春雨雪乃災也果以為瑞則冬月雷凍為瑞雷耶

景佐秋花

唐武后嘗季秋以梨花示宰相以為祥表賀杜景佐曰陰陽不相奪倫瀆  
即為灾今草木黃落而木復花瀆陰陽也恐陛下布德施令有所虧紊臣  
位宰相助天治物而不和臣之咎也願首請非武后曰此真宰相也

嘆稱亡鏡

太宗嘗謂侍臣曰夫以銅為鏡可以正衣冠以古為鏡可以知興替以人  
為鏡可以明得失朕嘗保此三鏡以防已過今魏徵傾逝一鏡亡矣

命停嚴鼓

太宗將伐遼時岑文本為中書令凡所籌度一以委之文本受委既深神  
情頓竭言辭舉措頗異平常太宗見而憂之謂左右曰文本與我同行恐  
不與我同返及至幽州遇暴疾而終其夕太宗聞嚴鼓之聲曰文本殞逝  
情深惻怛今宵夜警言所不忍聞命停之

新編古今事文類聚新集卷之六

新編古今事文類聚新集卷之七

都省部

南江富

大用

時可編

# 左右丞相

古今事實

文正大雅

宋王文正公居宰府僅二十年未嘗見愛惡之迹天下謂之大雅范文正集

萊公大忠

寇萊公嘗曰真宗有澶淵之幸而能左右天子不動如山却夷狄修宗廟  
天下謂之大忠同上

呂端持重

呂端為相持重取大跡每奏對同列多以諸公罕所建明一日內出手札  
戒曰今中書事必經呂端詳酌乃得奏聞言行錄

蒙正無隱

呂蒙正為相遇事敢言上嘉其無隱長編

善處大事

大中祥符九年上謂左右曰王旦善處大事真宰相也同上

能斷大事

元祐元年司馬光言切見文彥博沈敏有謀略知國家治躰能斷大事功  
效顯著此天下所以共知也

文武大政

景德元年上每得邊奏必先送中書謂畢士安寇準曰軍旅之事雖屬樞  
密院然中書總文武大政卿等當詳閱邊奏共參利害勿以事干樞密院  
而有所隱也

危疑大節

韓魏公琦為相十年當仁宗之末英宗之初朝廷多故公臨大節處危疑  
百利國家知死不為故能光輔三后大濟艱難坐置天下於大寧公之力  
也

用論語相

趙韓王普傳太宗時普曰臣用論語一半佐太祖定天下一半佐陛下致  
太平普為相日每絕婦朝則亟闔戶自啓一篋取一書而讀之終日雖家  
人不測也及妻旦出則是事決矣用是為常後普薨家人始得開是篋而  
見之則論語二十篇又李沆嘗喜論語或問之沆曰為宰相如論語中節  
用而愛人使民以時兩句尚未能行聖人之言終身誦之可也長編

用讀書人

太祖云作宰相須用儒者又云宰相須用讀書人嘗勸趙普以讀書普  
年手不釋卷會要

作釣魚詩

呂正惠公參知政事多獨召便殿語必移晷時呂蒙正為相會曲宴後苑  
上作釣魚詩斷章云欲餌金鈎深未達磻溪酒問釣魚人意以屬端後數  
日罷蒙正而相端言行錄

不殖貨產

上因講求輔弼謂左右曰朕聞范質居第之外不殖貨產真宰相也太宗亦素重質嘗對近臣稱累朝宰相以為循規矩重名器持廉節無出質右

長編

不傲寵澤

呂文穆公蒙正為相國三入中書惟公與趙韓王爾未嘗以姻戚傲寵澤

言行錄

不受苞苴

慶曆中杜衍為相苞苴貨賄不敢到其門時號清白宰相事畧

不為驕侈

王旦以儉約率子弟使在富貴不為驕侈兄子睦欲率進士旦曰吾常以太盛為懼其可與寒士爭進言行錄

封還內降

寶元四年吏部侍郎杜衍依前官平章事兼樞密使衍務救僥倖每內降

恩率寢格不行積詔旨至十數輒納上前諫官歐陽脩見上曰外人知杜衍封還內降耶凡有求于朕每以衍不可告之而止者多於所封還也編

奏格內降

趙忠簡公鼎遷左僕射平章事公以政事之先後及人材之所當召用者密條置座右一一奏而行之凡內降恩澤多奏格不行號為賢相言行錄

補奏復進

韓王趙普嘗欲用某人為某官不合太祖意不用明日普復奏之又不用明日又奏之太祖怒取其奏懷裂投地普徐拾歸補綴明日復進之上乃悟其後果稱其職長編

事不密啓

真宗問李沆曰人皆有密啓卿何獨無沆曰臣待罪宰相公事則公言之何用密啓人臣有密啓非讒則佞臣常惡之

抑求使相

李沆為相石保吉求為使相仁宗以問公上曰保吉因緣戚里無攻戰之

勞台席之拜恐騰物論遂寢其事

抑求節度

王文正公且為相宦者劉承規求為節度使真宗以語公也執以為不可曰他日將有求為樞密使者奈何至今內臣不過留後

戒抑貪進

王文正公曰可惜張師德向文簡曰何謂公曰累於上前說師德名家子有士行不意兩及吾門狀元及第榮進素定若復奔競使無階而進者當如何向公稱適有闕望公弗遺公曰第緩之使師德知聊以戒貪進激薄俗也 長編

除却例簿

景德三年寇準在中書喜用寒雋奉指多自任同列忌之嘗除官同列屢目吏持例簿以進準曰宰相所以器百官若用例非所以進賢退不肖也卻而不視 同上

不用浮薄

真宗初即位李沆為相帝嘗問治道所宜先沆曰不用浮薄新進喜事之人此最為先帝問其人如梅詢曾致堯是也帝深然之故終帝世數人皆不進用

稍旌恬退

文潞公為相因進對言嘗聞德音以措紳奔競非裁抑之無以厚風俗莫若稍旌恬退之人則躁競者知愧乃薦王安世韓維張瓌皆擢用焉

薦人不知

王文正公所薦人未嘗知寇準私公求為使相公驚曰將相之任豈可求耶已而制出除準武勝軍節度使同中書門下平章事準入見泣曰非陛下知臣何以至此真宗具道公所以薦準者準始愧歎

薦姪大用

呂文穆公致仕真宗幸其宅問曰卿諸子孰可用公對曰臣諸子皆豚犬不足用有姪夷簡任穎州推官宰相材也遂至大用

夾袋疏賢



呂蒙正嘗問諸子曰我為相外議如何諸子云大人為相天下无事善其  
但人言无能為事權多為同列所爭公曰我但有一能善用人耳此真宰  
相事也公夾袋中有冊子每四方人替罷謁見必問其有何人才隨即疏  
之朝廷求賢取之囊中故公為相文武百官各稱職者以此

密籍記名

王文正公為相賓客滿坐无敢以私干之者公察其可與言者召與語詢  
問四方利病觀其才之所長密籍記其名

不市私恩

李沆為相有求差遣見其材可取必正色拒之已而擢用或不足收用必  
和顏温語以待之子弟問其故公曰用賢人主之事我若受其請是市私  
恩也故峻絕之若其不足用者既失所望又无善辭此取怨之道也又范  
忠宣公純仁在相位所薦士未嘗知出於公公亦未嘗市恩意於人或謂  
公曰身為宰相豈可不牢籠天下士使知出於門下公曰但願朝廷進用  
不失正人何以須使知出我門下耶

大耐官職

向文簡除右僕射上謂李昌武曰朕即位以來未嘗除僕射敏中應甚喜  
賓客必多卿往觀之明日却對昌武往見丞相方謝客門元一人昌武入  
見之賀曰今日聞降麻士大夫莫不歡慰公但唯上又曰自上即位未嘗  
除端揆自非眷倚殊絕何以至此公復唯上又歷陳前世為僕射者勲業  
之盛禮命之重公亦唯上使人至厨中間有飲宴者亦寂无一人明日再  
對乃具以所見對上笑曰向敏中大耐官職言有錄

爭事上前

韓魏公言慶曆中與范希文富彥國同在兩府上前爭事各别下殿不失  
和氣如未嘗爭也當時正如推車子其心主於行而已魏王別錄

決策親征

澶淵之役寇公首乞親征時陳堯叟請幸蜀王欽若乞幸江南上召問之  
公曰誰為此謀者臣欲得獻策之人斬以釁鼓然後北伐上悟遂決澶淵  
之行公在澶淵每夕與楊億飲博詎歌諧謹誼呼達旦或就寢則鼻息如

雷上使人視之喜曰得渠如此吾復何憂時人比之謝安長編

大事自決

韓魏公琦為相曾公為丞相趙康靖歐陽為參政凡事該政令則曰問集賢該典故則曰問東廳該文事則曰問西廳至於大事則自決之人以為得宰相體同上

細務進狀

治平三年上謂宰臣曰朕日與卿等相見每欲從容議論治道但患進呈文字頗多不暇及中書常務有可付有司者悉以付之自是中書細務止進熟狀及事有定制者歸有司中書降敕而已長編

奏陳水旱

真宗初即位李沆為相王旦為參知政事沆日取四方水旱盜賊奏之且以為細事不足煩上聽沆曰人主少年當使知四方艱難不然血氣方剛不留意声色則土木甲兵禱祠之事作矣言行錄

奏辨災異

富弼傳神宗朝有於上前言災異皆天數非人事得失所至者弼曰人君所畏惟天若不畏天何事不可為者夫亂亡無幾矣即上書明其決不然者事畧

不賀蝗死

李沆為相時天下大蝗真宗使人於野得死蝗以示大臣明日他宰相率百官賀公獨以為不可後數日方奏事飛蝗蔽天長編

凡事問旦

真宗朝王旦拜平章事外統四夷內和百姓官吏得戢天下富庶祥符之間頌聲洋溢旦之力也兩府凡有大事真宗曰曾與王旦議否旦以為可即可其委任如此分紀

屬意相端見前作釣魚詩

兼判樞院

慶曆二年上曰軍國之務當悉歸中書樞密非古官然未欲遽改故正令中書同議樞密院事及張方平請廢樞密院上乃命平章事呂夷簡兼判

院事而章得象兼使慶曆五年宰臣賈昌朝陳執中言軍民之任自古則  
同有唐別命樞臣專主兵務五代始令相輔亦帶使名至于國初尚緣舊  
制乾德以後其職遂分是謂兩司兼持大柄向以閩陝未寧兵議須一復  
茲兼領適合權宜今西夏來廷防邊有序願罷兼樞密使從之長編

出為都督

紹興七年金虜與劉豫合兵入寇以右僕射張俊為江淮都督出視師

士夫相慶

文彥博富弼並命是日宣制上遣小黃門覘於庭士大夫皆相慶得人後  
數日歐陽脩奏事上以語脩且曰古人求相者或得於夢卜今朕用二相  
人情如此豈不賢於夢卜哉並同上

中外鼓舞

陳康伯時虜兵再犯淮甸人情大駭望公復用上親札遣中使即家居召  
公復拜尚書左僕射制出中外鼓舞言行錄

朝野慰望

蘇頌自至和中入相居京師閭巷之人皆聞頌名至是朝野相慶明日工  
部執政曰蘇頌甚慰人望長編

都民遮留

司馬公過闕庭衛士見公入皆以手加額曰此司馬相公也都民遮道呼  
曰公毋歸洛留相天子活百姓所在數千人聚觀之

兒童皆知誦

施點守聖真誠齋揚先生以書遺公曰若盛德大業不積宏模兒童走卒  
皆知公而誦之至於斟酌元氣調和誠美恢然有所兼容慨然无所顧慕  
用力勞而收效博者其知之天知之非兒童走卒所與知也言行錄又司  
馬君實作相蘇東坡以詩賀之曰兒童誦君實走卒知司馬

宦官不知名

仁宗問王素孰可命以相事者素曰臣何敢言上曰姑言之素曰惟宦官  
官妾不知名者可充其任仁宗曰如此則富弼可素曰陛下得人矣長編  
名聞夷狄

富弼早有公輔之望天下皆稱曰富公名聞夷狄遼使每至必問其出處安否

虜問起居

當

司馬光為政逾年而病居其半既沒其家得遺奏八紙上之皆手札論當世急務御篆表其墓道曰忠清粹德之碑光在相位遼人遣使入朝與吾使至虜中者虜必問光起居而遼人敕其边吏曰中國相司馬矣切毋生事開邊隙長編

天子命坐

宋初宰相見天子必命坐賜茶有大政事則面議之自餘號令刑賞但人熟狀猶有坐而論道之遺意

元老不名

真宗初即位對宰相皆不呼名呂端等再拜懇請帝曰公等顧命元老朕何敢比先帝乎長編又淳熙七年上宣諭曰每日常朝可同後殿之儀不必呼丞相名趙鼎奏君前臣名禮也臣豈敢當陛下欲少更朝儀須俟他

日有碩德在位施行未晚不可自微臣始孝宗聖政

鼎鑄有耳

開寶九年雷德驥言趙普強市人第宅聚斂財貨上怒叱之曰鼎鑄尚有耳汝不聞趙普吾社稷之臣乎長編

鼻能吸醋

范魯公質嘉謀偉量時稱名相嘗謂同列曰人能鼻吸三斗醋即可為宰相矣

賜商霖字

張文忠公商英傳時久旱不雨慧出天心商英拜相之夕大雨如注彗星不見上喜書商霖一尺字賜之

賜車攻詩

趙鼎為相上御書車攻詩宣示宰執鼎入謝上曰車攻宣玉中興之詩今當與卿等夙夜勉厲以修政事攘夷狄言行錄

趙呂並命

端拱元年參知政事呂蒙正為中書侍郎兼戶部尚書平章事上諭趙普曰卿勿以位高多縱勿以權勢自驕但能謹賞罰奉賢良彈愛憎何憂軍國之不治朕若有過卿勿面從古人恥其君不堯舜卿其念哉蒙正質厚寬簡有重望不結黨與遇事敢言上嘉其無隱故與普俱命長編

三相當國

宋初范魯公王祁公魏僕射富國咸平中呂文穆李文靖向文簡當國至和中文潞公富鄭公劉丞相當國退朝錄又嘉熙初喬行簡平章事李宗勉史嵩之為左右相邸報

三居相位

宋朝以來三居相位惟趙普與呂蒙正事畧

再世三世為相

宋朝再世父子宰相二家呂許公申公韓魏公儀公朝野雜記又三世宰相呂文穆公從子文靖從孫正獻近時史越王浩子衛王跡遠孫嵩之二世為相

祖孫兄弟並相

祖孫宰相者一家曾魯公欽道兄弟宰相者一家韓康公莊敏

相三十年

端拱元年五月普常戒其子弟曰吾受寵踰分固當以身許國私家之事吾无預焉爾等各宜勉勵勿重吾過故自宥命升宰相出入三十餘年未始為其親屬求恩澤者長編

未四十相

宋朝未四十相者范堯民三十一吳元中何文縝皆三十張魏公三十九朝野雜記

輔政十年

王曾安質端厚人莫敢干以私其名重天下前後輔政十年其所進退士人莫有知者范仲淹嘗以問曾曰夫執政恩欲歸已怨使誰當仲淹伏其言長編

為相一紀

王旦登柄用凡十八年為相首末凡一紀國史

兩入中書

李文正以司空致仕於家灯夕必安輿就其宅召至賜坐親醜飲之曰昉

兩入中書

宋書

宋書宋書宋書

言行錄

又呂許公張鄧公仁宗

朝皆再入退朝錄

又宋朝三入中書惟呂文穆趙韓王同上

三遷至相

宋琪與國八年正月以兵部員外郎為右諫議大夫同判三司參知政事十一月拜平章事

乘舟偏重

紹聖初章子厚召入相與陳瓘同舟因論國事陳瓘曰譬如此舟移置之左則左重移置之右則右重俱不可也熙寧未必全是元祐未必全非

推車主行

見前爭事上前

古今文集

雜著

梓人傳

柳子厚

裴封叔之第在光德里有梓人欸其門額備陳宇而處焉所取尋引規矩繩墨家不居斲斷之器問其能曰吾善度材視棟宇之制高深圓方短長之宜吾指使而羣工役焉捨我衆莫能就一字故食於官府吾受祿三倍作於私家吾收其直大半焉他日入其室其牀闕足而不能理曰將求他工余其笑之謂其无能而貪祿嗜貨者其後京兆尹將飾官署余往過焉委羣材會衆工或執斧斤或執刀鋸皆環立嚮之梓人左持引右執杖而中處焉量棟宇之任視木之能率揮其杖曰斧彼執斧者奔而右顧而指曰鋸彼執鋸者趨而左俄而斤者斲刀者削皆視其色俟其言莫敢自斷者其不勝任者怒而退之亦莫敢愠焉盈宮於堵盈尺而曲盡其制計其毫釐而構大厦無進退焉既成書于上棟曰某年某月某日某建則其姓字也凡執用之工不在列余園視大駭然後知其術之工大矣繼而歎曰彼將捨其手藝專其心術而能知體要者坎吾聞勞心者役人勞力者役於人彼其勞心者坎能者用而智者謀彼其智者坎是足為佐天子相天

下法矣物莫近乎此也彼為天下者本於人其執役者為徒隸為鄉師里胥其上為下士又其上為中士為上士又其上為大夫為卿為公離而為六職判而為百役外薄四海有方伯連率郡有守邑有宰皆有佐政其下有胥吏又其下皆有嗇夫版尹以就役焉猶衆工之各有執伎以食力也彼佐天子相天下者率而加焉指而使焉條其綱紀而盈縮焉齊其法制而整頓焉猶梓人之有規矩繩墨以定制也擇天下之士使稱其職居天下之人使安其業視都知野視野知國視國知天下其遠近細大可手據其圖而究焉猶梓人蚤宮於堵而績于成也能者進而由之使无所德不能者退而休之亦莫敢愠不銜能不矜名不親小勞不侵衆官日與天下之英才討論其大經猶梓人之善運衆工而不伐藝也夫然後相道得而萬國理矣相道既得萬國既理天下率首而望曰吾相之功也後之人循跡而慕曰彼相之才也士或談殷周之理者曰伊傅周召其百執事之勤勞而不得紀焉猶梓人自名其功而執用者不列也大哉相乎通是道者所謂相而已矣其不知休要者反此以恪勤為公以簿書為尊術能矜名

觀小勞侵衆官竊取六職百役之事於府廷而遺其大者遠者焉所謂不通是道者也猶梓人而不知繩墨之曲直規矩之方圓尋引之短長姑奪衆工之斧斤刀鋸以佐其藝又不能備其工以至敗績用而无所成也不亦謬歟或曰彼主為室者儻或發其私智牽制梓人之慮奪其世守而道謀是用雖不能成功豈其罪耶亦在任之而已余曰不然夫繩墨誠陳規矩誠設高者不可抑而下也狹者不可張而廣也由我則固不由我則圮彼將樂去固而就圮也則卷其術默其智悠爾而去不屈吾道是誠良梓人耳其或嗜其貨利忍而不能捨也喪其制量屈而不能守也棟橈屋壞則曰非我罪也可乎哉可乎哉余謂梓人之道類於相故書而藏之梓人盡古之審曲面勢者今謂之都料匠云余所遇者楊氏潛其名

政事堂記

李華

政事堂者自武德已來常於門下省議事之所謂之政事堂故長孫无忌起復授司空房元齡起復授左僕射魏徵授太子太師皆知門下省事至高宗光宅元年裴炎自侍中除中書令執宰相筆乃遷政事堂於中書省

記曰政事堂者君不可以枉道於天反道於地覆道於社稷无道於黎元此堂得以議之臣不可悖道於君逆道於人黷道於貨亂道於刑尅一方之命變王者之制此堂得以易之兵不可以擅與權不可以擅與貨不可以擅畜王澤不可以擅奪君恩不可以擅間私讎不可以擅報公爵不可以擅私此堂得以誅之事不可以輕入重罪不可以生入死法不可以剝害於人財不可以擅加於賦情不可以委之於倖亂不可以啓之於萌伐紊不賞削紊不封聞荒不救見饑不驚逆諫自賢違道傷古此堂得以殺之故曰廟堂之上樽俎之前有兵有刑有挺有刃有斧鉞有醜毒有夷族有破家登此堂者得以行之故伊尹放太甲之不嗣周公逐管蔡之不義霍光去昌邑之亂梁公正庐陵之位自君弱臣強之後宰相主生殺之柄天子掩九重之耳燮理化為權衡論道變為棊紐道變傾身禍敗不可勝數列國有傳青史有名可以為終身之誠无罪記云

待漏院記

王元之

天道不言而品物亨歲功成者何謂也四時之更五行之佐宜宣其氣矣聖人不言而萬姓親萬邦寧者何謂也三公論道六卿分職宜張其教矣是知君逸于上臣勞于下法乎天也古之善相天下者自皐夔至于房魏可數也是亦不獨有其德亦皆務于勤耳况夙夜寐以事一人卿大夫尚尔况宰相乎朝廷自國初因舊制設宰相待漏院于丹鳳之門右示勤政也至若北闕向曙東方未明相君啓行煌煌火城相君至止噦噦鸞聲金門未闢玉漏猶滴相君下車于焉以息待漏之際相君得不有思乎其或兆民未安思使泰之四夷未附思使來之兵革未息何以弭之田疇多荒何以闢之賢人在野思使進之佞臣在朝思使黜之六氣不和災眚荐至仍避位以禳之五刑未措欺詐日生請修德以釐之憂心忡忡待旦而入九門既啓四聰甚迓相君言焉時君納焉皇風於是乎清夷蒼生以之而富庶若然則總百官食万錢非幸也宜也其或私讎未復思所逐之舊恩未報思所榮之子女玉帛何以致之車馬器玩何以取之奸人附勢我將陟之直士抗言我將黜之三時告災君有憂色構巧辭以說之羣吏弄法君聞怨言進諛言以媚之私心愒愒假寐而坐九門既開重瞳屢回相



君言焉時君感焉政柄於是乎陳哉帝位以之而危矣若然則死下獄投  
遠方非不幸也亦宜也是知一國之政万人之命懸于宰相可不慎哉復  
有无毀无譽旅進旅退竊位而苟祿備負而全身者亦无所取焉棘寺小  
吏王其偶為主請誌院壁用示于執政者

相州畫錦堂記

歐陽永叔

仕宦而至將相富貴而歸故鄉此人情之所榮而今昔之所同也蓋士方  
窮時困阨閭里庸人孺子皆得易而侮之若季子不禮於其嫂買臣見棄  
於其妻一旦高車駟馬旗旄導前而騎卒擁後夾道之人相與駢肩累迹  
瞻皆嗟嗟而所謂庸夫愚婦者奔走駭汗羞愧俯伏以自悔罪於車塵馬  
足之間此一介之士得志當時而意氣之盛昔人比之衣錦之榮者也惟  
大丞相衛國公韓琦也則不然世有令德為時名卿自公少時已擢高科  
登顯仕海內之士聞下風而望餘光者蓋亦有年矣所謂將相而富貴皆  
公所宜有非如窮阨之人僥倖得志於一時出於庸夫愚婦之不意以驚  
駭而誇耀之也然則高牙大纛不足為公榮桓圭衮裳不足為公貴惟德  
被生民而功施社稷勒之金石播之聲詩以耀後世而垂無窮此公之志  
而士亦以望於公也豈止誇一時榮一鄉哉公在至和中嘗以武康之節  
來治于相乃作畫錦之堂于後園既又刻詩於石以遺相人其言以快恩  
讎矜名譽為可薄蓋不以昔人所誇者為榮而以為戒於此見公之視富  
貴為如何而其志豈易量哉故能出入將相勤勞王家而夷險一節至於  
臨大事決大議垂紳正笏不動声色而措天下於泰山之安可謂社稷之  
臣矣其豐功成烈所以銘彝鼎而被絃歌者乃邦家之光非閭里之榮也  
余雖不獲登公之堂幸嘗竊誦公之詩樂公之志有成而喜為天下道也  
於是乎書

僕射議

杜佑

按僕射秦官其名則微其職甚細東漢以後雖委任漸重職司會府而非  
百僚師長之職也又按丞相亦秦官秦氏每羣臣上表皆云丞相臣某為  
首漢之宗臣蕭何為丞相漢儀丞相進天子御座為起在輿為下有疾法  
駕至第問得戮二千石申屠嘉欲斬內史晁錯是也霍光受顧託之重當

伊周之地廢昌邑王上表太后丞相臣敞為首大司馬將軍臣光次之其  
尊崇如此中間嘗置左右未嘗改為相國亦為大司徒大抵漢之丞相是  
為三公於天下無所不統後漢以至三公為宰相則司徒本西漢丞相也  
其後為丞相或為相國或為大丞相雖互為之名其實一也曹公司馬師  
昭趙王倫王敦王導劉義宣齊高帝梁武帝爾朱榮侯景陳武帝齊獻武  
隋文帝皆為之歷代多非尋常人臣之職亦多為贈官然自秦以降實居  
百僚之長今尚書令總領眾務提率綱目僕射貳之誠為崇重且非統國  
政宰天下之任宜侍中中書令如直以尊崇則太師不然上公太尉始可  
師長命百僚也龍朔中天寶初嘗改侍中中書令為左右相遠叶伊尹仲  
虺為左右相周公召公相成王為左右之義斯誠允當或謂尚書令僕射  
則錄尚書之職是官之師長案前代錄尚書霍光張安世王鳳趙喜牟融  
鄧彪張禹李固王道緒彥回齊明帝之徒或是三師或是三公或是大將  
軍大司馬兼之皆秉朝政猶古冢宰百官總已實宰輔也其時別自有令  
僕今僕射雖嘗改為丞相名同而職異品秩又未崇極上有三師三公尚  
書令七人豈比前代丞相受任也其龍養名無實者若今刺史皆云使持  
節案前代使持節得戮二千其王公已下封國皆南面臣人分茅建社其  
關府儀同三司則禮數班秩皆如三公置府辟吏今並豈有其實乎此例  
甚眾不能遍舉安有僕射因改丞相之名都無丞相之實而為百僚師長  
也又與丞即絕禮若以隔品致敬則諸司長官與隔品僚屬其可絕禮乎  
斯不然矣謹議

上光範書

韓退之

正月二十七日韓愈再拜獻書相公閣下詩之序曰菁也者義樂育材也  
君子能長育人材則天下喜樂之矣孟子曰樂得天下英才而教育之此  
皆聖人賢士之所極言至論古今之所宜法者也然則孰能長育天下之  
人材將非吾君與吾相乎孰能教育天下之英才將非吾君與吾相乎今  
若聞有以書進宰相而求仕者而宰相不辱焉而薦之天子而爵命之而  
布其書於四方枯槁沉溺魁閎寬通之士必且洋洋焉動其心峨峨焉纓  
其冠于焉而來矣後十九日復上書曰向上書及所著文後得命凡十

九日不得命恐懼不敢遁逃不知所為乃復自納不測之誅以求畢其說  
且今節度觀察使及防禦營田諸小使尚得自舉判官無間於已仕未仕  
者况在宰相吾君所尊敬者而曰不可乎後二十九日復上書曰愈聞周  
公之為輔相其急於見賢也方一食三吐其哺方一沐三握其髮嘗是時  
天下之賢才皆已舉用姦邪詭佞欺負之徒皆已除去四海皆已無虞九  
夷八蠻在荒服之外者皆已賓貢天災時變昆蟲草木之妖皆已銷息天  
下所謂禮樂刑政教化之見皆已脩理風俗皆已敦厚動植之物風雨霜  
露之所霑被者皆已得宜休徵嘉瑞麟鳳龜龍之屬皆已滿至而周公以  
聖人之才憑叔父之親其所輔理承化之功又盡章々如是其所求進見  
之士豈復有賢於周公者哉不惟不賢於周公而已豈復有賢於時百執  
事者哉豈復有所計議能補於周公之化哉然而周公求之如此其急惟  
恐耳目有所不聞見思慮有所未及以負成王託周公之意不得於天下  
之心如周公之心設使其時輔理承化之功未及盡章々如是而非聖人之  
才而無叔父之親則將不暇食與沐矣豈特吐哺握髮為勤而止哉維其  
如是故于今頌成王之德而稱周公之功不衰今閣下為輔相亦近耳天  
下之賢才豈盡舉用奸邪詭佞欺負之徒豈盡除去四海豈盡無虞九夷  
八蠻之在荒服之外者豈盡賓貢天災時變昆蟲草木之妖豈盡銷息天  
下所謂禮樂刑政教化之具豈盡脩理風俗豈盡敦厚動植之物風雨霜  
露之所霑被者豈盡得宜休徵嘉瑞麟鳳龜龍之屬豈盡備至其所求進  
見之士雖不足以希望盛德至比於百執事豈盡出其下哉其所稱說豈  
盡無所補哉今雖不能如周公吐哺握髮亦宜引而進之察其所以而去  
就之不宜默々而已也愈之待命四十餘日矣書拜上而志不得通足三  
及門而閣人辭焉惟其昏愚不知逃遁故復有周公之說焉閣下其亦察  
之古之士三月不仕則相弔故出疆必載質然所以重於自進者以其於  
周不可則去之魯於魯不可則去之齊於齊不可則去之宋之鄭之秦之  
楚也今天下一君四海一國舍乎此則夷狄矣去父母之邦矣故士之行  
道者不得於朝則山林而已矣山林者士之所獨善自養而不憂天下者  
所能安也如有憂天下之心則不能矣故愈每自進而不知愧焉書取上

足數及門而不知止焉寧獨如此而已揣之焉惟不出大賢之門下是懼亦惟少垂察焉瀆冒威尊惶恐無已

上杜相公書

曾鞏

大宰相者以已之材為天下用則用天下而不足以天下之材為天下用則用天下而有餘古之稱良宰相者異焉知此而已矣舜嘗為宰相矣稱其功則曰舉八元八凱稱其德則曰無為者其舜也欤卒之為宰相者無與舜比也則宰相之體其亦可知也已或曰舜大聖人也或曰舜遠矣不可尚也請言近之可言莫若漢與唐漢之相曰陳平對文帝曰陛下即問決獄責廷尉問錢穀責治粟內史周勃曰且陛下問長安盜賊數又可強對耶問平之所以為宰相者則曰使卿大夫各得任其職也觀平之所自任者如此而漢之治莫盛於平為相時則其所守者可謂當矣降而至於唐之相曰房杜當房杜之時所與共事則長孫无忌岑文本主諫諍則魏鄭公王珪振綱維則戴胄劉洎持憲法則張元素孫伏伽用兵征伐則李勣李靖長民守土則李文亮其餘為卿大夫各任其事則馬周溫彥博

杜正倫張行成李綱虞世南褚遂良之徒不可勝數夫諫諍其君與正綱維持憲法用兵征伐長民守土皆天下之大務也而及付之人又與人共宰相之任又有他卿大夫各任其事則房杜者何為者耶考於其傳不過曰聞人有善若已有之不求備取人不以已長格物隨能收叙不隔卑賤而已卒之稱良宰相者必先此二人然則著於近者宰相之躰其亦可知也已唐以降天下未嘗无宰相也稱良相者不過一二大節可道語而已能以天下之材為天下用真知宰相躰者其誰哉數歲之間閣下為宰相當是時人主方急於致天下治而當世之士豪傑魁壘者相繼而進雖還於朝雖然邪者惡之庸者忌之亦甚矣獨閣下奮然自信滌海內之善人用於世爭出其力以唱而助之惟恐失其所自立使豪傑者皆若素絲門下以出於是與人佐人主立州縣李為累日之格以勵李者農桑以損益之數為吏陞黜之法重名教以矯衰弊之俗變苟且以起百官衆職之墜華任子之濫明賞罰之信一切欲整齊法度以立天下之本而庶幾三代之事雖然紛而疑且排其議者亦衆矣閣下復毅然堅金石之斷周旋

上下扶持樹植欲使其有成也及不合矣則引身而退與之俱否嗚呼能以天下之材為天下用真宰相躰者非閣下其誰哉使克其所樹立功德可勝道哉雖不克其志豈愧於五帝三代漢唐之為宰相者哉若鞏者誠鄙且賤然嘗從事於書而得聞古聖賢之道每觀今賢傑之士角立並出與三代漢唐相侔則未嘗不歎其盛也觀閣下與之反復議而更張廢事之意知後有聖人作救萬事之弊不易此矣則未嘗不愛其明也觀其不合而散逐消藏則未嘗不恨其道之難行也以歎其盛愛其明恨其道之難行之心豈須臾忘其人哉地之相去也千里世之相後也千載尚慕而欲見之况同其時過其門墻之下也欤今也過閣下之門又當閣下釋袞冕而歸非千名蹈利者所趨走之日故敢道其所以然而并書雜文一編以為進拜之資蒙賜之一見焉則其願得矣噫賢閣下之心非繫於見否也而復汲汲如是者蓋其欣慕之志而已耳伏惟幸察

賀陳丞相書

朱元晦

恭聞制書延拜進秉國鈞凡在陶鎔孰不欣賴伏惟明公以大忠壯節早負天下之望自知政事贊襄密勿凡所論執皆係安危至其甚者輒以身之去就爭之雖未即而天子之信公也益篤天下之望公也益深凜凜然惟懼其一旦必去而不可留也夫明公所以得此於上下者豈徒然哉今也進而位乎天子之宰中外之望莫不欣然咸曰陳公前日之言天下之言也爭之不得危於去矣而今乃為相則是天子有味乎陳公之言而將卒從之也陳公其必以是要說上前而決辭受之幾矣且天下之事其大且急者又不待此陳公果不得謝而立乎其位必且次第為上言之為上行之其不默然而受兀然而居也明矣喜雖至愚亦有是說然今也聽於下風亦既餘月政令之出黜陟之施未有卓然大異於前日則是明公蓋未嘗以中外之望於公者自任而苟焉以就其位矣喜愛知之深切所愧歎未知明公且將何以善其後也請得少效其愚而明公擇焉蓋聞古之君子君大臣之位者其於天下之事知之不惑任之有餘則汲上乎及其時而勇為之知有所未明力有所未足則咨訪講求以進其知技援汲引以求其助如採火追亡尤不敢以少緩上不敢愚其君以為不足與言仁

義下不敢鄙其民以為不足以興教化中不敢薄其士大夫以為不足其  
成事功一日立乎其位則一日業乎其官一日不得乎其官則不敢一日  
立乎其位有所愛而不肯為者私也有所畏而不敢為者亦私也屹然中  
立無一毫私情之累而惟知為其職之所業為者夫如是是以志足以行  
道上足以濟時而於大臣之責可以無愧不審明公圖所以善其後者其  
有合於此乎其有近於此乎无乃復有進於此者而熹之愚不足以知之  
乎願亟圖之庶乎充足以終慰天下之望毋使前日之放然者更為今日  
之悒然也抑熹又有請焉蓋熹嘗辱明公賜之書矣其言有曰前輩為大  
官不過持循法度主張公道知無不言輔君以德公行賞罰進賢退不肖  
而已今日事有至難風俗敗壞官吏苟且強敵在前邊備未立如之何其  
可為也熹愚不肖深有所疑蓋凡明公之所易者皆古人之所難而明公  
之所難者乃古人之所易也反覆思慮不得其說將以質之左右而未暇  
也今者敢因修慶而冒以為請伏惟明公試反諸心而以事理之輕重本  
末權之誠知天真難易之所在而有以用其心焉則亦无難之不易矣詩

律詩

曰伐柯伐柯其則不遠願明公留意則天下幸甚

獻僕射相公

薛許昌

清如水室重如山百辟嚴趨禮絕攀驪虜外聞應喪膽平人長見尺開顏  
朝廷有道青春好門館无私白日閑致却垂衣更何事幾多詩句詠關

贈寇相公

陳充

十年閑纜濟川舟今日開懷叙九疇道合自符伊鼎用人賢非在傳岩求  
寰區更喜民無病稼穡先知歲有秋長與聖朝恢壽域食霞難訪赤松遊

沙路曲

李賀

柳陰半眠丞相樹珮馬玳玲踏沙路帝前簪笏称南山獨垂重印押千官  
金利篆字紅屈盤沙路歸來聞好語旱火不光天下雨

題相州韓相公茶端堂

歐陽永叔

白首三朝社稷臣壺漿夾道擁如雲金貂爭看真丞相竹馬尤迎舊使君  
豈止軒裳誇故里已將鍾鼎勒元勳不須授簡揖前客好奉平津自有文

詩話

老鳳不去

曾魯公公亮自嘉祐秉政至熙寧中尚在雖年甚高而精力不衰故臺諫无非之者唯李復圭以為不可作詩云老鳳池邊蹲不去餓鳥臺上噤无

詩占大拜

唐宰相國罷右司負外郎寄寓荊州作詩云印將金鎖上簾用玉鈎鈎即京兆大拜氣際詩中已見之矣北窓贊言

作詩相嘲

揚收王鐸逢皆同年也收作相逢作詩曰須知金印朝天客同是沙堤避路人威鳳偶時皆瑞聖應龍无水謾通神收大嚼之王拜相逢又作詩曰昨日鴻毛萬鈞重今朝山嶽一毫輕鐸又怒之

在中書十四秋

真宗時王且拜平章事外抗四夷內和百姓官吏得職天下富庶祥符之

間頌声洋溢且之力也兩府凡有大事真宗曰曾與王且議否且以為可即可其委任如此陝郊處士魏野以詩寄且曰聖朝宰相年上出公在中書十四秋西祀東封俱禮畢好來相伴赤松遊且感悟遂求退

登庸夜鉢相傳

郡氏聞見錄范魯公質奉進士主文和凝愛其文以第十三登第謂質曰君之文宜冠多士屈居第十三者欲君傳老夫有鉢耳質以為榮有獻詩云從此廟堂添故事登庸衣鉢亦相傳後果為相

# 平章事

歷代沿革

唐太宗貞觀八年僕射李靖以疾辭位詔疾小瘳三兩日一

侍即郭待奉兵部侍郎岑長倩等同中書門下平章事入銜自待奉等始自是之後終唐之世不能改唐百官志宋舊相特命平決軍國事者凡四人天禧中王文正公以首相告老拜太尉兼侍中五日一朝遇軍

國大事不以時入參決公懇辭不拜慶曆初呂文靖公亦以首相求罷拜司空平章軍國事公辭之元祐初文忠烈公自太師落致仕除平章軍國重事未幾呂正獻公以右揆求去亦除司空同平章軍國事潞公五日一朝申公兩日一朝開禧元年初置平章軍國事以命韓侂胄蓋侂胄繫御比申公省同字則其体尤專比潞公省重字則其所與者廣見朝野雜記嘉熙後又加以重字以喬行簡等為之位丞相之上

**元**

尚書省致平章政事二人位在左右二相下

**羣書要語**

平章百姓百姓昭明協和萬邦書堯典坐朝問道垂拱平章周丹嗣文金鉉重名銀章賫服劉禹錫代平章事表

**古今事實**

僕射平章

正觀八年僕射李靖以疾辭位詔疾小瘳三兩日一至中書門下平章事

冢宰平章

裴冕肅宗至扶風召赴行在拜左相代宗立詔攝冢宰固辭以疾乞間日

入政事堂平章事帝優之聽入閣不趨為御小延英召對唐本傳

皆先平章

唐李珣曰太宗用宰臣天下事皆先平章謂之平章事

不帶平章

唐裴度奏狀不帶平章事昭愍皇帝謂韋處厚曰度既曾為宰相何无平章事處厚因奏為逢吉所擠裴度自僕射出鎮具元遂於舊街城落帝曰何至是耶遂復詔同平章事

天子尊禮

杜佑拜檢校司空同中書門下平章事歲餘乞致仕詔三五日一入中書平章政事佑每進見天子尊禮之官而不名後數年因乞骸骨許之分紀

天下重輕

裴度太和四年詔進司徒平章軍國重事三五日一入中書狀貌不踰中人而神觀爽邁操守堅正善上對既有功名震四夷用不用常為天下重輕同上



中官昇堂

唐故事宰相不預政事堂邀客時海內多務丞相元載等見中官宣傳詔令至中書者引之昇政事堂仍致榻待之李現為相即令去榻

典章書壁

李愚為平章事性剛介往往形言然無人唱和者但奉六典之舊草書之粉壁其經緯大畧全无所施

閱表得名

宋璟罷帝欲用張嘉正而忘其名夜召韋抗曰朕嘗記其風操今為北方大將姓張而復名卿為朕思之夜半因觀文臣表奏一閱而得其名遂以為中書侍郎同門下平章事張嘉正傳

上簿署名

鄭絳每以詩託諷中人有誦于帝前者昭宗意其有蘊未盡因有司上班簿遂署其側曰可禮部侍郎同中書門下平章事鄭絳傳

五日入中書

鄭覃以疾乞去位有詔解太子太師許以五日一入中書商量政事分紀

三日入中書

裴度數引疾不任機事詔三五日一入中書平章政事同上

對盧杞姦邪

唐李勉以檢校司徒平章事貞元初帝起盧杞為刺史表高還詔帝問勉曰衆謂盧杞奸邪朕顧不知謂何勉曰天下皆知陛下獨不知此所以為奸邪也時避其對

絕輔國求相

裴冕為僕射平章事時李輔國驕甚求為宰臣肅宗曰以功勳力何官不可但未允朝望如何輔國諷冕聯章薦已帝密謂宰臣蕭華曰輔國欲帶平章事卿等欲有章薦信乎華問冕曰初无此事吾臂可截宰相不可得也華入奏帝喜曰冕固堪大用輔國深銜之

乘輿入門

五代盧程自太原觀察判官命為平章事程本非重器驟塵顯位率止不

常受命之日即乘有輿騶導喧沸帝聞呵導之聲詢于左右曰宰相擔子入門帝駭異登樓視之笑

### 求帶許郡

漢蘇逢吉為司空平章事貪贖貨財无所顧避求仕人稍有物力者即遣人微露風旨許以美秩特秦王從暉字永吉至闕下逢吉謂王之裔必有重貨乃遣人求先人玉帶且以一郡許之求吉辭以素无縱有者不堪奉獻逢吉乃市一玉帶價數千緡使求吉償其直

### 名教宗主

五代趙光逢為平章事當有女真寄黃金一鑑於其室亂離女真變化於他土後二十年金无所歸納於河南尹張全義請付諸宮觀其舊封尚在兩丁廊廟四退丘園百行五常不欺閭室檮紳咸仰以為名教宗主

### 清白宰相

宋慶曆間杜衍為平章事苞苴寶貨不敢到其門時號為清白宰相

### 足尊老成

文彥博召赴闕既而御史中丞劉摯左正言朱光庭右正言王覲俱上言彥博春秋高不可為三省長官司馬公又言若令以正太師平章軍國重事亦足以尊老成矣遂下制如公言事畧

### 與聞重事

平章軍國事祖宗所以優待元勳重德之意王呂二公所平章重事之目不可得而考潞公所謂重事則大典禮大刑政待從管軍三京尹三路師臣以上乃與聞之比申公去重字則政事无所不關第省其常程細務而已朝野雜記

### 重事參決

天禧元年王旦太尉兼侍中許五日一赴起居每起居日入中書或遇軍國重事不限時日並令人預參決分紀

### 大事同議

慶曆三年詔宰臣呂夷簡每有軍國大事與中書樞密院同議以聞以夷簡宿疾在身故有是命同上

大政共議

文彥博平章軍國重事詔一月兩赴經筵六日一入朝因至廟堂與執政商量事朝建有大政令即與輔臣共議

時游廟堂

東坡行呂公著平章制屢貢封章力求退避朕重失此三益之友而閔勞以萬機之煩又云母廢議論時游廟堂可特授司空同平章軍國事一月三赴經筵二日一入朝因至都堂議軍國事

士艷其榮

元祐元年以呂公著平章事國朝大臣以三公平章軍國事四人其二人則呂公著父子也士艷其榮補畧

使問其年

文潞公彥博平章軍國重事契丹使耶律永昌劉霽來聘蘇軾奉詔館客與使者入覲望見公殿門外契丹改容曰此潞公也耶所謂以德服人者問其年曰何壯也軾曰使者見其容未聞其語其綜理庶務釀酢事物雖

精練少年有不及貫穿古今洽聞強記雖專門名家有不逮使者拱手曰天下異人也言行錄

古今文集

雜著

讓同平章事表

李疇

臣言高品吳千金至奉制加臣銀青光祿大夫同中書門下平章事兼徐泗濠等州節度觀察處置等使餘如故者初受恩榮若登霄漢退思塵忝如獲春水中謝臣聞以德詔官以勞定賞苟或虛受人無勸心臣自守方

隅累更時歲荷唐虞宣力之寄乏奉魯報政之能愧无可稱以答高位豈意聖慈弘獎天澤存加以燮贊之崇名被庸虛之陋質懼速官謗有玷大猷伏以宰相之職安危是注其在當否繫于滌舒唯以材升例无平進奉不矢德則副蒼生之心苟非其人或致夷戎之哂臣雖愚昧嘗覽前言豈

敢冒榮家安竊位輒思事理冀及為義若以汴河要津漕運所切徐方倣擾師旅未寧謹當上稟睿謀下貞戎律尅期而進屈指可平効衆之先是

臣之志既行其事必在正名所加節制安敢飾讓至於銀青貴服金鉉重  
名勳績無聞豈宜濫及伏乞賜寢前命俯亮愚衷微臣有遂心之宜聖朝  
无不稱之服名器斯慎退讓有聞遐迩聆風孰不知勸

為補庶子謝平章事表

權德輿

祇荷成命捧讀詔書心竄震驚拜抃失所中謝臣聞燮贊化源參和鼎實  
上合一德以平六符苟非其所繫斯重臣本虛薄素无器能徒以文藝  
獲承代業比有多事陳力清時累叨渥恩踐履官序頃歲奉職中禁草議  
南宮遂忝左曹列於近侍顧常內訟已慮曠官豈謂宸眷特加擢任非據  
伏自循省不知所安且臣去冬尚守郎吏今終一歲遂備台司苟非全才  
難塞公議雖鞠躬匪懈必尽事君之誠而宣化賦政恐累知臣之幸生成  
難報覆餗是憂伏以面奉德音不敢更有陳讓拜章感涕上吞何階无任  
荷戴惶惧之至謹奉表陳謝以聞

代杜司徒謝平章事表

劉禹錫

臣某言伏蒙獎拔超踐鈞衡慮玷大猷味死陳讓再奉嚴旨不令固辭恩  
厚命輕位高責重中謝臣聞天下安危注意將相處論道具瞻之地當總  
戎作鎮之權雖叶夢而求无聞秉鉞之寄登壇以拜不兼調鼎之榮授受  
惟艱伊昔猶尔况臣庸瑣何以克堪陛下玄造曲成大明私照俾掌戎律  
獲參廟謨寵光之命在臣已極毫髮之效於國何施謹當罄竭微誠奉薄  
至教仗天威以懾不順敷聖澤以遂羣生上分旰食之憂下塞素食之責  
力誠不足心實念茲伏乞皇明俯賜昭鑒臣恪居官次遐守藩維不獲伏  
謝彤庭陳露丹襟心存闕下同犬馬之戀恩身在淮濱仰雲天而結思无  
任懇悃屏營之至

除文彥博平章軍國重事制

見太師部

鄧潤甫

除呂公著司空同平章軍國事制

見司空部

鄧潤甫

律詩

上平章王相公

魏野

聖朝宰相年々出君在中書十四秋西祀東封俱禮畢好未相伴赤松遊

新編古今事文類聚新集卷之八

南江富大用時可編

四 省屬部

# 左右丞

**歷代沿革**

成帝建始四年置尚書員五人有四丞光武始減其二唯置左右丞掌錄文書期會左丞主吏民章服及騶伯史右丞假署印綬及紙筆墨諸財用庫藏至晉不改晉左丞主臺內禁令宗廟祠祀朝儀禮制選用署吏給假左丞掌臺內庫藏及諸器用民戶租布刑獄軍器督錄遠近文書章表奏事宋齊梁隋皆有是官唐龍朔元年改左右丞曰左右肅機咸亨元年復舊名五代梁開平二年改左右丞為左右司侍郎避廟諱也至後唐同光元年復舊宋元祐令尚書左右丞並正二品為執政官

**大元**以為宰相之貳佐治省事

羣書要語

尚書左丞彈八座以下居機密之會斯乃皇朝之司直天臺之管轄傳咸答李光序

古今事實

左君右君

漢制丞即見二丞呼曰左君右君宋百官志

左綱右轄

白居易為授庾承宣尚書左丞制云吾前命崔從持左綱今乃命承宣攝右轄無俾戴刘魏杜專美於貞觀中

號曰神人

張諷少修志節性聰明有令才鄉曲號曰神人除尚書侍郎左丞進對威儀辭言辨遠帝深奇之後漢書

方於管轄

唐劉洎上疏曰尚書萬機是為政本是以八座比於文昌二丞方於管轄八座畏憚

晉荀晞為左丞廉察諸曹八座已下皆側目憚之

三臺肅清

晉劉儼為尚書右丞正色在朝三臺肅清

臺閣自肅

晉傅咸為右丞臺閣大小望風自肅諸公贊

即吏脩整

韋弘景素以鯁亮稱及拜左丞居綱轄之地即吏望風脩整

職稱朕望

唐戴胄拜尚書右丞尋遷左丞太宗謂胄曰尚書省天下綱維百司所稟若一事有失天下必有受其弊者今無令僕保之於卿當稱朕所望也胄性明敏馭斷明速議者以為左右丞稱職武德以來一人而已

功滿詔留

黃香拜左丞功滿當還詔書留增秩拜尚書遷僕射東觀漢記

豪貴拂席

王維以詩名盛於開元天寶間諸王駙馬豪貴之家無不拂席迎之乾元中為尚書右丞

有司供帳

張說代源乾曜為左丞視事之日上勅所司供帳設音樂內出酒食御製詩一篇以叙其事

記令史名

劉覽除尚書左丞令史七百人一見並記姓名當官清正無所私

對三騶飲

南史尚書丞給三騶謝幾卿性不拘朝憲嘗預宴游苑不得醉而歸因詣道邊酒肆停車褰帷與車前三騶對飲觀者如堵幾卿處之自若

上殿不下

吳賀琛遷尚書左丞并參禮儀事琛前後凡郊廟諸議多所創定每見高祖與語常移晷刻省中為之語曰上殿不下有賀雅琛容止都雅故時人以此呼之

至門不開

北齊張耀為尚書左丞文宣近出令耀居守文宣夜還耀不開門勤兵嚴備火至看面然後開迎文宣笑曰君欲學郢君章也賜以錦袍以其忠勤遂見親待

不置僕射

唐貞觀中字文節為尚書右丞明習法令以幹局見稱江夏王道宗嘗以私事託於節遂奏之太宗大悅賜帛二百疋勞之曰朕不置左右僕射者正以卿在省耳

怒對宰相

顏真卿為尚書左丞代宗車駕自陝府還真卿請先謁五陵孔廟而後還官宰相元載謂真卿曰公所見雖美其如不合時宜何真卿怒而前曰用舍在相公言者何罪然朝廷事豈堪相公再破除邪載深銜之

奏求良田

隋楊汪為兵部侍郎數年文帝謂諫議大夫王達曰卿為我覓一好左丞

達遂私於汪曰我當薦君為左丞若事果當與良田為報汪以達言奏之達竟獲罪尋拜汪尚書汪明習法令果於割斷時號稱職

### 劾競銀窰

隋即茂為尚書左丞時工部尚書宇文愷右翊衛大將軍于仲文競河東銀窰茂奏劾愷位望已隆祿賜優厚拔葵去織寂爾無聞求利下交曾無愧色仲文大將軍近臣趨侍階庭朝夕聞道虞芮之風抑而不慕分銖之利知而必爭何以貽範庶慄示人軌物愷與仲文竟坐得罪

### 美錦令製

崔思謙初拜右丞奏曰陛下為官擇人非其人則闕今不惜美錦令臣製之此陛下知臣之深亦微臣盡命之秋

### 挽弩自射

晉郤詵為尚書左丞糾吏部尚書崔洪洪曰我舉郤丞而還奏我此為挽弩自射詵聞曰昔趙宣子任韓厥為司馬厥以軍法戮宣子之僕宣子謂諸大夫可賀我矣崔疾為國舉才我以才見舉唯才是視各明至公何故

### 斯言洪聞悅服

### 歷園按火

趙洵為監察御史時禁中失火火發處與東宮相近代宗疑之洵為巡使俾令即訊洵因歷孺園按據迹狀乃上直中官遺火所致也既奏代宗稱賞德宗時在東宮常感洵究理詳明及刺襍州年考既深與觀察使韓滉不相得滉奏免洵官德宗見名謂宰相曰豈非末泰初御史趙洵乎對曰然即日拜尚書左丞

### 當食批案

唐楊昉為左丞時宇文化及子孫理資蔭朝廷以事隔兩朝且親族衆多為言左司未詳其案狀訴者以道理已成無復疑滯勃然通昉昉曰適朝退未食食畢當詳案訴者曰公云未食亦知天下有累年羈旅者乎昉命案立批之曰父殺隋主子訴隋資生者猶配遠方死者無宜更叙時人深賞之

### 短偃曲鈞



唐崔善為武德中歷尚書左丞甚得時譽諸曹惡其聰察因其身短而偃  
嘲之曰崔子曲如鈎隨例得封侯轉上全無項曾前別有頭高祖聞勞勉  
之因購流言者加其罪

儒被擲器

晉王國寶因酒坐怒古丞祖台之襜袂呼喚以盤盞樂器擲台之為有司  
所彈烈宗詔曰國寶縱肆情性其不可長台之懦弱非監司躰其免官

古今文集

雜著

王右丞制

貳

元厚之

朕循唐制復文昌府以令僕執國大政而丞為之式禮復秩峻茲謂輔臣  
具官其亮直清明有猷有守服在禁近厥聞惟休茲用命爾以中大夫正  
秩于右轄於職度習雖逸法艱為初凡厥有官弗祇弗迪亦惟朕政未發  
于中其能允諧時汝之任往服朕命厥惟懋哉

蒲左丞制

元厚之

同右丞某官問學才猷該洽通敏自朕識拔揚于禁嚴是用命爾以中大  
夫正秩于左綱於職若音大猷訓迪在位時朕忱汝協濟茲惟祇辟可以  
肅刻曹惟若德可以熙庶績圖休于永冀尚懋哉

劉摯尚書右丞誥

蘇子由

漢御史大夫能任其職則為丞相近世中執法議論不撓亦補執政昔我  
仁宗優養正士開受直言時則有若包拯張昇之流咸以敢言獲聞大政  
舊俗已遠此風寂寥容悅相承亦棄不用朕追懷先王選建忠賢謬上之  
聲庶幾前烈具官劉摯早以御史小事裕陵力陳是非不避權寵十年流  
落志氣不衰召置臺端首開正論進任中司之要屢開白簡之言風聲凜  
然國是以定朕欲試其行事之實是用付以右轄之權治忽所關寄任尤  
重夫以言責人甚易以義持已實難爾其勉之毋使輔政之功不若言事  
之效

謝除尚書右丞表

蘇子由

溥汗之恩已行而不反偃倭之志雖勤而莫伸上愧鴻私下慙公議恭惟

皇帝陛下接堯舜之統蹈成康之仁體貌先正耆老之臣棟技後來翹秀之士俛仰六載前後幾人坦然公明故不私賢否之實穆然淵默故坐照情偽之真臨御久則鑒愈明得失分則下無隱如臣者西南賤士章句少儒早歲猖狂偶竊方聞之選中年流落既安縣尹之卑遭時乏人致位近侍跌宕文墨之圃聶需議論之場舉皆空言安有实效顧惟省轄之重實參國論之餘豈無遺賢濠及微品地寒資淺何以望三事之餘光才短力罷安能越六聯之滯論雖復黽勉就職愧歎何言此蓋伏遇皇帝陛下天地之仁曲成草木之陋父母之愛不錄子弟之非將建大厦以覆群生故收衆材而無棄物然臣負過其力受非所容惟有繫已無私或不孤於托付引類自助幸得免於顛躋不渝始終少荅恩造

為樊左丞讓官表

臣某言伏奉今月二十八日制除臣尚書左丞寵命俯臨慙願自失泛大鯨之海但資竟搖載臣暨鼉之山未如恩重臣聞尚書百揆羽亮萬機故天上尊北斗中樞陛下有南宮左轄晉昇孔坦諒直當時漢拜揚喬開練故事廢得百僚有憚於會府諸侯取法於京師臣實謏才謬登清貫握蘭起草昔秦朝經剖竹頒條近貽人瘼備歷中外無聞声庸版圖再緝貢賦未均於九州銅印更操威儀不檢於三署次即補缺豈易其人聖主求才宜難此受竊謂旁求俊乂側訪壤竒必使德合準繩言成綱紀興化致理時無間言况安上必在於薦賢危身莫踰於曠職儻蒙垂收紫綬俯矜丹誠愚臣保陳力之言聖鑒有責成之地無任颺冒惶悚之極謹詣朝堂奉表陳讓以聞臣所讓人別狀封進

古詩

上韋左丞二十韻

杜甫

鳳歷軒轅紀龍飛四十春八荒開壽域一氣轉洪鈞霖雨思賢佐丹青憶老臣應圖求駿馬驚代得麒麟沙汰江河濁調和鼎鼐新韋賢初相漢范叔已歸秦盛業今如此傳經固絕倫豫樟深出地滄海闊無津北斗司喉舌東方領縉紳持衡留藻鑑聽履上星辰獨步才超古餘波德照鄰聰明過管輅尺牘倒陳導豈是池中物由來席上珍廟堂知至理風俗盡還淳

才傑俱登用愚蒙但隱淪長卿多病久子夏索居貧回首驅流俗生涯似  
衆人巫咸不可問鄒魯莫容身感激時將晚蒼茫只有神為公歌此曲涕  
淚在衣中

贈韋左丞文濟

杜甫

左轄頗虛位今年得舊儒相門韋氏在經術漢臣須待議歸前列天倫恨  
莫俱鴝原荒宿草鳳沼接<sup>身</sup>衢有客雖安命衰容豈壯夫家人憂<sup>身</sup>杖甲  
子泥塗不謂矜餘力還來謁大巫歲寒仍顧遇日暮且踟躕老驥思千  
里飢鷹待一呼君能微感激亦足慰榛蕪

參知政事

歷代沿革

**後魏**古弼為尚書令參知政事**隋**蘇威高穎等參預朝政**唐**  
劉洎張文瓘皆參知政事魏徵杜淹等參預朝政崔仁師等  
參知機務此其始也**宋**乾德二年太祖已相趙普畏其專將擇官以為  
副而難其名稱召陶穀問曰下丞相一等有何官對曰唐有參知機務

參知政事今可用之遂命薛居正呂餘慶為參知政事仍令不押班不  
知印不升政事堂止令就宣徽使厅上視事殿庭別設塲位於宰相後  
勅尾書銜降宰相數字月俸雜給半之蓋帝意未欲令居正等名與普  
齊也會要○史臣錢若水等曰按唐高宗嘗欲用郭待峯參知政事復  
以其資淺止令同承受平章事亞於參政矣穀言失之

開寶六年詔參

政薛居正等於都堂與宰相同議公事又詔中書門下押班知印宜令  
與居正等同知雍熙四年御史言文德殿常朝百官皆有塲位唯參知  
政事未有詔令依位排砌至道元年詔參政與宰相分日知印押正衙  
其塲位先異宜合為一並得升都堂二年詔自今參知政事不知印押  
班塲位列宰相後不升政事堂然押勅齊銜行並馬至今不易參政行  
丞相事多不踰年淳熙初葉夢錫龔夔之行丞相近三年言者以為懷  
私嘉泰許深甫為參政命陳勉之兼權又除袁起巖蓋三負也嘉定初  
命雷季仲麥育發樓大防亦三負遂為故事**大元**尚書省置參知政事  
二人為宰相貳佐治省事

**奉書要語**

參聞政本取重端副唐李靖制宜緝台階之政唐崔日用制

變贊化原參知鼎實柳子厚代謝表擢參相府貳秩台衡揚

意謝表須陪議於宰涂賜曾公亮批豫大政於萬機下丞相之一等實錄

贊貳國鈞參圖朝論歐陽集黃樞貳取侍講金華紫府引真參謀玉鉉陳

**古今事實**

希烈制參聞政道陪貳宰司賜曾公亮批

詩句疾風知勁草板蕩識誠臣太宗賜蕭瑀

崔湜文詞

唐崔湜初執政也年二十七容止端雅文詞清麗嘗暮出端門下天津馬

上自吟曰春還上林苑花滿洛陽城張燕公時為工部侍郎望之杳然而

歎曰此句可效位可得其年不可及也翰林盛事本傳

戴曾忠直

唐戴曾為尚書參預朝政太宗嘗謂群臣戴曾於我无骨肉之親其實忠

直厲行情深体國

諭除銀鈞

隋蘇威與高穎參掌朝政威見宮中以銀為幔鈞因盛陳節儉之美以諭

上上為改容彫飾舊物悉命除毀本傳

解賜佩刀

唐魏徵知門下省事詔朝章國典參議得失他日宴群臣帝曰納忠諫正

朕違為國家長利徵而已雖有古名臣亦何以加親解佩刀以賜本傳

貢金不受

褚遂良進黃門侍郎參綜朝政莫離支貢金遂良曰討弒君之罪不受其

賂分紀進爵以酬

唐戴曾為吏部尚書參預朝政太宗嘗謂群臣戴曾於我無骨肉之親但

其忠直厲行情深体國事有裒要無不以聞所進官爵以酬厥勞尔本傳

蹈履仁義

魏謚與杜淹等以秘書監參預朝政上問徵與諸葛亮孰賢云帝曰徵

蹈履仁義以弼朕躬致之堯舜雖無以抗本傳

勸行仁義

魏證字元成正觀三年以秘書監參預朝政於是帝即位四年天下大治  
蠻夷君長襲衣冠帶刀宿衛東薄海南踰嶺戶闔不閉行旅不齎糧取給  
於道帝謂群臣曰此徵勸我行仁義既効矣本傳

參掌機密

魏文帝即位劉放孫資轉為左右丞參掌機密評曰劉放文翰孫資勤謹  
並管喉舌權聞當時三國志

輔贊聖德

施大資字聖與自除簽書未一日即參大政總軍國之務者凡六載所  
建明為多尤以輸忠切諫輔贊聖德為心言行錄

守道耿介

唐蕭瑀復參預朝政帝曰武德季太上皇有發立議瑀於尔時不以利怵  
死懼社稷之臣也因賜詩曰疾風知勁草板蕩識誠臣又曰公守道耿介

古无以過然善惡大明或有時而失瑀頓首謝曰既蒙教又許以忠亮雖

死日猶生年也本傳

風範端凝

李沆嘗侍曲宴太宗目送之曰李沆風範端凝真貴人也俄除參知政事  
取源

剛毅守節

薛簡肅公奎字宿藝拜參知政事公入謝上曰先帝嘗言卿可用吾今用  
卿矣公感激自勵而素剛毅守節不苟合既與政充挺立無所牽隨言行錄

剛正立朝

魯肅簡公立朝剛正嫉惡少容在政府七年務裁抑僥倖不以名器私人  
同上

稱為五貴

隋蘇威字文述裴矩裴蘊虞世基參掌朝政時人稱為五貴蘇威傳

不直一錢

李昉素與盧多遜善待之不疑多遜知政事諳昉於上前人有言於昉曰  
盧與我厚不當爾後盧敗昉知政事及盧事昉頗為揮解之上因言曰盧  
多遜常毀卿不直一錢昉乃信上由此益重昉常目之為善人

真宰相才

寇萊公準召為參知政事嘗奏事切直太宗怒起輒攀帝衣復坐事決乃  
退太宗曰此真宰相材也太宗實錄

真台輔器

趙公普為相呂端為參政嘗語人曰吾觀呂公奏事得嘉賞未嘗喜遇抑  
挫未嘗懼亦不形於色真台輔之器也

中書總目

歐陽文忠公脩字永叔公在政府凡兵民官吏財利之要中書所當知者  
集為總目遇事不復求之有司公與韓公同心輔政每議事心所未可必  
力爭韓公亦開懷不疑故加祐之政世多以為得言行錄

天章條事

范文正公仲淹字希文為參知政事每進見上以太平責之既而再賜手  
詔趣使條天下事又開天章閣召見賜坐授以紙筆使疏於前公退而條  
列所宜先者十數事上之言行錄又宋元憲公庠帝召二府天章閣觀書  
上出詔目問天下利病事公時參知政事獨進曰臣等願至中書條上既  
退章數千言奏之後皆施用同上

兼樞密院

趙忠簡公鼎字元鎮宰執奏事上詔孟度沈與求並兼樞密趙鼎曰仁  
宗陝西用兵宰臣兼樞密今臣既兼而參與亦令兼樞則事歸一体無前  
人所謂密院調兵而三省不知三省財竭而密院用兵不止者矣言行錄

同議邊事

紹興四年六月臣僚言仁宗皇帝康定初陝西用兵知樞密院晏殊言近  
詔邊事宰臣參議而參知政事獨不與聞乞自今並許同議仍令書檢帝  
曰議政之臣所當同國休戚詔皆從之望檢會康定故事應密院邊事之  
大者詔參知政事同議仍書檢詔依見行條例仍自今三省官通書檢中

面議政事

趙清獻公抃字閱道參知政事感激思奮面議政事有不盡者輒密啓聞上手詔嘉之公與富弼曾公亮唐介同心輔政率以公議為主言行錄

前陳利害

王文忠公堯臣字伯庸在政事堂議論有所不同必反復切劘至於是而後止不為獨見在上前所陳利害甚多言行錄

前辯是非

唐質肅公介拜參知政事與同列論政事未嘗阿屈雖在帝前必究功辯析要是非之歸帝以是益敬信之而天下翕然想望其風采一日語諸子曰吾備位政府知無不言桃李固未嘗為汝等栽培而荆棘則甚多矣

論禁朋黨

慶曆四年上與執政論及朋黨事參政范仲淹對曰自古以來邪正在朝未嘗不各為黨不可禁也在聖鑒辨之耳誠使君子相朋為善其於國家

何害懷水記聞

令薦人材

趙忠簡公鼎在洪二年召還除參知政事上令鼎薦人材公即以朱震汜同呂祉陳橐呂本中林季仲薰蔡上之言行錄

面折賈琰

竇儻與賈琰同事太宗府中太宗嘗與諸王府射琰稱贊而多矯誕儻叱之太宗不樂因罷會曰太祖出儻陞州後為參知政事太宗謂曰卿何以至此曰陛下以藩邸舊恩至此太宗曰非也卿嘗面折賈琰賞卿之直耳職源

頭歐劉樹

後魏古弼太武時為尚書令參知政事方欲奏除滅苑囿遇太武與劉樹圍基弼梓樹頭歐其背太武奇弼公直皆可其奏以與百姓通鑑

取法韓歐

周益國文忠公必大除參知政事上曰近見卿遇事殊不依違執政之於

宰相事任非遠自當和而不同公曰韓琦歐陽脩殿上日有所爭退則懽然無間最為可法言行錄

### 勞曰裴度

慶曆中具州兵士王則反明鎬師久無功參知政事文彥博請行上欣然委之凱旋除平章事又見上勞之曰卿朕之裴度也職源

### 太平宰輔

王文正參預朝政一日便殿論邊事退文正歎曰何日邊候徹警使吾輩得為太平宰輔李文靖公不答至中書召文正語之惟聖人能內外無患自非聖人外寧必有內憂譬人有疾常在目前則知憂而治之言行錄

### 清優李士

孫夢得為參知政事曰俸祿差厚爾與李士亦不甚相遠但清優不如李士而勞責過之東齋記事

### 自節度除

丁謂自保信軍節度使知江寧召為參知政事以當降麻盛文肅為李士以為參知政事合用舍人草制遂以制除丁其銜之倦遊錄

### 與相職均

張方平除參政制曰參議大政雖下丞相一等至於坐斷廟堂之論上則幹元化以調四時下則宅至仁以澤萬類近則群元仰首以承德遠則殊俗交脞以待命蓋與宰相之職業均丁殊

### 一負押麻

凡鎖院文臣職事官承務郎蓋務官通直即以上明日赴文德殿聽麻宰相樞密皆不往惟輪參政一負押麻麻卷自內出閣門啓御封兩吏對展宣贊舍人南面播笏又手摘首尾詞及階官以授參政參政付中書吏百官不拜而退若大詔令及冊后之類則宰相文武百僚俱入淳熙王堂雜記

### 輪日知印

至道元年詔自今參知政事宜與宰相輪日知印押正銜其位埒先異位宜合為一商議軍國政事並得升都堂閏七月衝改會要

### 乘傳赴闕



淳化四年知大名府趙昌言乘傳赴闕拜給事中參知政事即日赴中書  
視事長編

轉官加階

王冀公以參知政事判大名府召不加邑封契丹方講好真宗欲重其事  
冀公入謝特命以衣帶鞍馬賜之自後二府轉官加階勳封邑入謝皆有  
對賜分紀

唐喜得人

薛簡肅公奎拜參知政事公嘗使契丹議論服其坐中及聞公用皆喜曰  
是得人矣六一文

行且相卿

契丹謀入寇畢文簡公士安首疏五事帝多納用中書闕相乃進公參知  
政事帝曰未也行且相卿言行錄

魚頭公

唐肅簡公參大政樞密使曹利用恃權驕橫公屢折之帝前時貴戚用事  
者莫不憚之目為魚頭參政因其姓且言骨鯁如魚頭也同上

骰子選

丁謂作參政或率楊文公賀之公曰骰子選耳何足道哉東齋筆記

魏證批鱗

魏證參預朝政帝曰人言徵舉動疏慢我見其妩媚耳對曰陛下道臣使  
言臣不敢數批逆鱗哉本傳

丁謂拂鬚

丁謂參知政事嘗會食於中書有羹汚中書冠進鬚謂與拂之準曰君為  
參預大臣而與官長拂鬚耶謂顧左右深愧恨之

召母賜坐

賈黃中兩受詔知貢奉多揀拔寒俊號為無私又掌吏部選事品藻精當  
上益知其才拜給事中參知政事召見其母王氏賜坐與語曰教子如此  
真所謂今之孟母也因賦詩以美之賜子甚厚事畧

加父優恩

參知政事父見其進拜者盧朱崖吳正肅與尚書張公安道樞副陳堯叟  
張文孝吳文肅田登用而朝廷多優加其父恩命焉春明退朝錄

不交一談

張洎為給事中參知政事與寇準同列先準知吏部選事洎掌考功為吏  
部官屬準年少新進氣銳思欲老儒附以自大洎夙夜坐曹每冠帶候準  
於省門揖而退不交一談準益重之後既同秉大政準亦忌之洎奉事準  
愈謹政事一決於準無所參預

不曉一句

張洎為參知政事嘗越次奏曰呂端等備位廊廟上有所詢問乃默然不  
言深失訐謨之牀端曰洎雖有所言皆不過伴揣陛下意耳上默然明日  
洎上疏徵賈捐之棄珠崖事願棄灵武以省閔隴餉餽上初有意既而悔  
之覽奏不悅却以付洎謂曰卿所謂朕不曉一句洎皇恐流汗而退

同議都堂

會要開寶六年六月詔參政薛居正呂餘慶於都堂與宰相趙普同議公

事

坐退思巖

魯宗道為執政營一小室畫山水朝退獨坐謂之退思巖維妻子亦不許

入国老閑談

古今文集

雜著

蔡叅政制

元厚之

勅卿輔之任為朕股肱惟高謀博識可以濟太平之功惟同德一心可以  
成天下之務居嘗遴選尤謂才難具官某幸足以造微智足以適變向繇  
禁近遂長憲基繩術糾繆而多所贊襄指佞彈邪而無所迴隱維持大法  
以尊君愛國為心排沮異端以陳紀立經為務詢求列位尔實忠嘉斷自  
朕心進參天政夫惟以公滅私則無朋黨之毀以忠事上則有輔德之休  
祗服訓誥往欽朕命可特授

章參政制

元厚之

勅朕若稽古正名于百工惟門下二品副侍中之職與聞國論實左右予  
具官某重資雋明通達治躰嘗陪宰府出殿帥藩今茲命尔躋秩于東省  
尔其念哉民之利病在賦政之臧否在官人官非其人政或失當出納  
自尔往惟欽哉

讓知政事表

李嶠

有命自天光寵踰量如集于木啓處失圖中謝臣聞簡賢任能百揆所以  
時叙謬官失職九流於是咸曠隆替所寄義不可輕臣才實凡庸志無遠  
大叨預簪纓遂升臺閣踐金門而遊石室掌狐史而參鳳綸被蟬蟒之衣  
徒切榮寵接化鳥鷺之羽久慙尸曠甘受妨賢之責忽承非次之恩廼使參  
預機衡獻替帷幄持濟巨之舟楫味和羹之醴醢以挈瓶之智陪負鼎之  
遊將何以祗奉帝惟弼亮皇極况丹青所運鼓舜通於四時鑪錘所裁綱  
紀行於萬俗動關政躰豈易其人臣才缺行踈藝殫術淺同子房之多病  
異吳漢之強力策支離之杖未振其軀資擁腫之材豈勝其任將恐貽災  
傾鍊取辱敗軍喪失虧名夫豈足惜害公撓法惑焉是懼敢緣陳力之義  
輕布由衷之請伏冀九霄垂澤三舍迴光躰臣不移之愚矜臣難奪之志  
特傳過謬改命才賢則器滿之凶不累於凡鄙棟隆之吉永光於聖代

辭免參知政事表

歐陽脩

職參論道宜極選於一時授匪其人實駭聞於衆聽恩命所被踳踏難安  
中謝伏念臣本乏材能徒緣幸會列于侍從白首無聞置在樞機素飡已  
甚雖聖主之恩天地曲示含容而朝廷之事毫釐動關利害豈止曠官之  
誚每懷設國之憂矧惟政事之臣實代天工之任俾之贊貳宜擇材賢伏  
望 皇帝陛下收設獎之恩廣僉諧之訪憫疲駑之已試備見无庸求後  
又以在廷擢之不次俾或安於舊職冀免速於罪辜報效之誠殞糜後已

謝除參知政事表

歐陽脩

贊貳國鈞參聞妙論謂且不次之選冀得非常之材乃以叙遷比之承乏  
設恩過被訴讓靡從中謝伏念臣少迫賤貧偶勤孝問儒者博而寡斐况  
匪多聞文章世之空言豈能適用徒以早邁亨嘉之會驟蒙獎擢之私叨  
言語侍從之流逮今踰紀玷出納樞機之任初之可矜幸先彈理之未加

每欲遂巡而忍去敢期睿眷俾與政機優以寵章進其爵秩望非意及榮  
與憂并此蓋伏遇 皇帝陛下堯德聰明禹躬勤儉博求俊乂以濟治康  
謂臣既樸且愚必能循於忠謹雖庸而懦尚可策其疲駑猥以備員遂茲  
冒寵敢不益堅素守自勉不強惟殫犬馬之勞上答乾坤之造

辭免參知政事劄子

樓鑰

承命下臨抚躬增惕竊以中書之本萬化固資參預之良近弼之有二臣  
足稱倚毗之重敢言推擇誤及凡庸伏念臣滄黜從班叨塵宥府才再周  
於月館已疊被於恩綸玩愒自慙於事功而何補衰疲既甚况疾病之復  
侵方將俟使介之旋便請掛衣冠而退忽驚寵渥俾與政機載故舊章間  
有三人之同列若稽近比未聞兩地之贅員伏望 皇帝陛下俯察由衷  
曲矜過分收還成渥願亟賜於俞音茂東英才以共扶於輿運

辭免參知政事表

樓鑰

進參政柄誠出誤恩冒貢遜函未回淵聽存布懇祈之切敢辭俯偃之恭  
中謝伏念臣才不逮中身今既老十載排根之已甚實倍費於保全一朝  
收召而復還又屢叨於褒擢非敢忘知止之義蓋欲堅圖報之心今則疾  
疾交侵徒強顏而自醜年齡云迈顧納祿之未能使在旬月之間稍有毫  
釐之補序迂而上已分已逾而况據案牘而書名雖具負而何益對冕旒  
而奏事无長策之可陳誤寵所加群言必駭伏望 皇帝陛下念經綸之  
事重思輔贊之才難別選英髦俾作調元之助毋容衰瘁更詒濫吹之譏  
或昇舊班俯存孤迹

謝除參知政事表

樓鑰

充貳樞庭方慙玩偈晉陪宰路遽被推迂倍深臨谷之危莫遂循墻之請  
中謝竊以朝廷建輔號天子之四鄰政事參聞下丞相之一等定名稱於  
乾德復官制於建炎必求異能乃副隆委伏念臣類齡景迫壯志日凋再  
掌吏銓但守停年之格濫居宥府未寬思職之憂雖粗竭於謏才終莫裨  
於末議負二宜去有七弗堪宿恙漸侵將籲天而致禱誤恩狎至真踏地  
以靡違况秉鈞當軸之虛負而知印押班之分日兼與漢章之約仍從商  
皓之游命服匪頒復賜天閑之駿爰田增衍更開公社之封昔在本兵尚

為僥冒茲叨助理尤懼曠疎茲蓋伏遇 皇帝陛下盛德又新至誠樂與折衝禦侮坐底於外寧聚精會神力先於內治東求俊又實在弼諧肆令衰退之蹤亦忝延登之數臣敢不益殫愚慮仰贊宏規曰都曰俞頽竊慕賡歌之喜知足知止庶幾從告老之私

上曾參政書

臨溪

某聞古之君子立而相天下必因其材力之所宜形勢之所安而役使之故人得盡其材而樂出乎其時今也某材不足以任劇而又多病不敢自蔽而數以聞執事矣而閣下必欲使之察一道之吏而寄之以刑獄之事非所謂因其材力之所宜也某親老矣有上氣之疾日夕比年加之風眩勢不可以去左右閣下必欲使之奔走跋涉不常乎親之側非所謂因其形勢之所安也伏惟閣下由君子之道以相天下故某得布其私焉論者或以為事君使之左則左使之右則右害有至於死而不敢避勞有至於病而不敢辭者人臣之義也某竊以為不然上之使人也既因其材力之所宜形勢之所安則使之左而左使之右而右可也上之使人也不因其材力之所宜形勢之所安上將无以報吾君下將无以慰吾親然且左右惟所使則是无義无命而苟悅之為可也害有至於死而不敢避者義无所避之也勞有至於病而不敢辭者義无所辭之也今天下之吏其材可以備一道之使而无不可為之勢其志又欲得此以有為者蓋不可勝數則某之事非所謂不可辭之地而不可避之時也論者又以為人臣之事其君與人子之事其親其勢不可得而兼也其材不足以任事而勢不可以去親之左右則致為臣而養可也某又竊以為不然古之民也有常產矣然而事親者猶將輕其志重其祿所以為養今也仕則有常祿而居則无常產而特將輕去其所以為養非所謂為人子事親之義也其其之材固不足以任使事矣然尚有可任者在吾君與吾相處之而已爾固不可以去親之左右矣然任豈有不便於養者乎在吾君與吾相處之而已爾然以某之賤未嘗得比於門牆之側而慨然以鄙樸之辭自通於閣下之前欲得其所求自常人觀之宜其終齟齬而無所合也自君子觀之由君子之道以相天下則宜不為遠近易慮而不以親疎改施如天之無不燾

而施之各以其命之所宜如地之無不載而生之各以其性之所有彼常  
人之心區區好伎而自私不怨已以及物者豈足以量之邪伏惟閣下垂  
聽而念焉使天下士無復思古之君子而樂出乎閣下之時而又使常人  
之觀閣下者不能量也豈非君子之所願而樂者乎胃贖威尊不任惶恐  
之至

與鄭參政劄

朱晦庵

山野伉拙處世不諧然自少日即蒙當世一二鉅公教誨期許待以國士  
君常厲志不敢少貶以辱其門亦庶幾得因濟會少有毫髮以自效於當  
世不意莫年此志不遂而又適遭時論大變威福下移忠賢奔波海內震  
駭病中聞之憤悶鬱結至死無路亟欲草疏自通幾或開悟而子弟諸生  
交謁更諫以為如此適增國家之累而無益紛拏累日疾勢遂侵此乃窮  
命使然亦無足言者今若得以因病辭官并脫無名之職則與世長辭  
含笑入地無所恨矣伏惟參政矜憐有素切望乘此機會曲賜保全萬一  
更有纏繞不遂所懷則素素心尚在本未能平一旦遇事感觸不能自己  
更以垂死之年自貽投竄之禍亦非參政之所欲也抑時事如此有識寒  
心而參政從容其間未肯身任其責此亦中外所深疑者而竊猶竊恐高  
明之有待而發也不知其果然耶其不然耶如其果然則安危之機相去  
日遠亦不可以少緩矣垂絕之言無復倫次唯此一念炳然如丹伏惟明  
公念之

詩話

作釣魚詩見前參政類

新編古今事文類聚新集卷之九

南江富大用時可編

省屬部

# 左右司

即中

負外郎

## 歷代沿革

**隋**煬帝三年尚書都司始置左右司即各一人品同諸曹郎從五品掌都省之職**唐**武德初省正觀初復置改為郎中龍

朔二年改為左右承務咸亨中復舊名掌副左右丞所轄諸司事天后永昌元年復增置左右司負外郎各一人神龍初省後復置**宋**朝以為階官元豐正名始實有職掌左右司即中各一人負外郎各一人凡四負掌奉諸司之綱紀號為都司亦曰左右曹元豐六年都司置御史房主行彈劾御史按察失職七年御史房置簿以書御史六曹官糾核之多寡當否為殿最紹聖初詔都司以歲終點檢六曹稽違太多者其姓名取旨二年詔御史臺察六曹稽違失者送左司記定建炎三年以

此後或之繼時去  
而真醉醲然高  
事吸山休端寒

置檢正省左右司二員明年復隆興元年詔左右司即官各差一員減罷二員二年詔左司書擬吏戶禮機速房右司書擬兵刑工賞功房文字後以右司掌刑房事任為劇乃置二員（大元）左司掌總察吏戶禮三部受事傳事右司掌總察兵刑工三部受事付事各置即中員外郎都事其屬有祗候郎君架閣庫管勾同管勾等人

**羣書要語**

三公天子之股肱掾屬三公之喉舌漢崔寔傳二十四司呼左右司為都公唐書董正六曹瓊淪省闈紀綱百司

左右司掌受付六曹之事而率正文書之稽失四朝志率稽違署符目知

宿直為丞之貳六典掌率諸司之綱紀與百察之程式以正邦理以宣邦

教同上位膺列宿爵綰通班總八座之繁司承万機之要務鐫會府掌

北斗之璣衡肅之禮闈擢南宮之樞輿張鷟劾許謚文尚書政本左右司

綱紀之地故即選異於諸曹南豐擬制都司分治六官事无巨細畢陳于

前若綱在綱振之則率弛之則廢宋城除孫寬制中臺都司主以即更非

獨付受書奏亦以助正紀綱除張康國等制升冠都司之右趙及制都司

**公事事實**

紀綱之地非習知臺閣故事不在茲選同上參訂左曹參訂右曹同上

毗佐助鼎

太尉司徒司空長史秩比千石號為毗佐三台助鼎和味應邵漢宮儀

台佐加貂

褚球字仲宝為司徒右長史加貂佐加貂始自球南史

玄冕黻裳

隋煬帝始置左右司即各一人宋因改曰即中服章與諸司即中並同玄冕五旒衣无章裳刺黻一章兩梁冠

玄纓纁裳

天后永昌元年始置左右司員外郎各一人時顧琮自侍御史陳元康真以洛州司戶迁其朝服與諸司員外郎並爵弁玄纓纁裳一梁冠

以文辭薦



白敏中字用晦為左司員外郎武宗唯聞白居易名欲召用之是時居易病足宰相李德裕薦敏中文辭類其兄而有器識

以詳整稱

武元衡字伯蒼遷左司郎中詳整任職時以詳整稱重

勵志獨立

隋骨儀為右司郎中于時政漸濁亂貨賂公行士夫變節而儀勵志守常介然獨立隋書

草疏極言

張拭字敬夫除右司員外郎知閣門事張說除簽書拭夜草手疏極言其不可且詣宰相質責之宰相慙憤不堪而上獨不以為忤親札疏尾付宰相使諭旨拭復奏上意感悟命得中寢楊誠齋集

精簡得人

太宗朝劉洎上疏曰尚書萬幾乃為政本比者綱維不率並為勳親在位品非其任幼勢相傾將救茲弊且宜精簡四員左右丞左右司郎中如並

得人自然綱維一率亦當矯正趨競豈惟息其稽滯哉唐書

掄選有序

吳王潛為左司郎中典選事時喪亂之後官失其守甲簿湮沒潛雍容款接坐客常滿隨才而接人人自以為得徐知誥相吳掄選有序潛之力也九國志

公厅決事

劉摯傳摯遷右司郎中初宰相每於執政分厅時請問白事多持兩端伺意旨摯始請以公禮聚見共決可否

都堂坐白

張維字振綱留為左司郎中遇事有未便輒詣都堂坐白或甚曰瑣上辨切非朝官體公曰都司助調鼎實幾微所關若視吏籤擬輒涉筆書不置可否安用我輩耶晦庵集

沮大臣議

倪濤字臣濟遷左司員外郎朝廷議有事燕雲大臣爭先決策為固位計

濤獨曰天下久平士不習戰軍儲又屈无輕議以貽後患宰相王黼怒曰左司敢沮軍耶罷之東都事畧本傳

宣都司力

葉顥除右司時孝宗初即位欲清中書之務增宰士之員公膺首選遷左司一日帝召諫官曰葉顥在都司二年甚宣力然與宰相為朋黨諫官對曰臣不識葉顥聞之公論不然因其陳求外補意帝默然良久曰非知則朕无以知此人越翌日除吏部侍郎兼權給事中楊誠齋集

書數曾布

陳瓘為右司員外即以書獻曾布曰尊私史而壓宗廟緣邊費而壞先政皆閣下之過也布讀之大怒辨論移時瓘指事叙言辭色不撓堂吏北肩竦觀又以日錄辨國用須知繳申三省遂出知秦州丁未錄

面折願浩

紹興三年時方審量濫賞以左右司領之呂願浩當國時有縱舍右司員外郎王岡輒持不可曰公秉國鈞於天下具瞻之地不平謂何怨始有所

歸矣願浩嬰然中興系年錄

出使除職

元豐六年七月左司郎中范雍直龍圖閣河北轉運使都司出使除職自此始元祐元年范子奇范純夫自左右司出為河北京東轉運皆用雍例

直龍圖閣長編

被劾失職

許鑑為左司郎中不稱職張鷟劾之云位膺列宿爵綰通班總八座之繁司承萬機之要務唐書

自書除目

王震字子發元豐四年開天章閣初用官制大除拜詔震與吳雍從輔臣執筆入記聖語面授右司員外郎直使自書除目時論榮之哲宗實錄本傳

李為宰相

紹興十三年三省擬進右司郎中上謂輔臣曰神宗聖訓云左右司便是李為宰相豈可不謹擇會要

# 都事

## 歷代沿革

本尚書都令史之職令史蓋前漢官也漢尚書臺令史秩二百石魏令史皆八品晉尚書都令史八人秩二百石與左右丞總知都臺事宋齊八人梁陳五人品並第八隋開皇初改都令史為都事置八人正八品上唐置六人從七品上自晉宋齊後魏北齊隋置八者當八座之數梁陳置五者當五曹之數唐置六者當六曹之數宋尚書省都事正八品大元於左右二司各置都事亦古制也

## 古今事實

絳服賢冠

都令史絳朝服進賢二梁冠官品第八唐月八斗晉百官表注

朱衣執板

自魏晉宋齊正令史書令史皆有品秩朱衣執板進賢二梁冠齊職儀

判事側坐

尚書郎判事正坐都令史側坐書令史過事北齊故事

在任專孝

虞溥字允元為偏將軍領兵備隴西在任專孝以郎中補尚書都令史

有國士風

趙孟字長舒補尚書都令史善於清談有國士之風其面有疵黥諸事不決皆言當問疵面

言古葬地

太康六年尚書郎令史王銍上言古葬必於不食之地不妨民令率土之臣各附京邑求墓地廣種松柏臣恐數十年後民稀松柏相望非永安之制

大業六年尚書

言古

尚書

尚書

有國士風

尚書

五

尚書

新編古今事文類聚新集卷之十

南江富

大用

時可編

六曹部

# 總尚書

歷代沿革

尚書古官也周為內史周禮司會中大夫二人戰國時有尚

漢初有尚冠尚衣尚食尚浴尚席尚書謂之六尚武帝遊宴後始用

宦者主中書以司馬遷為之遂罷其官以為中書之職成帝建始四年

罷中書宦者又置尚書五人一人為僕射而四人分為四曹通掌圖書

祕記章奏之事各有其任一曰常侍曹主丞相御史公卿事二曰二千

石曹主刺史郡國事三曰民曹主吏民上書事四曰主客曹主外國夷

狄事後又置三公曹主斷獄是為五曹後漢光武以三公曹主歲盡考

課諸州郡事改常侍曹為吏部曹主選舉祠祀事民曹主繕修工作監

也園苑事客曹主護駕老胡朝賀事一千石曹主辭訟事中都官曹主  
水火盜賊事合為六曹是時尚書雖有曹名不以為號靈帝以侍中梁  
鵠為選部尚書於此始見曹名魏改選部為吏部又有吏部左民客曹  
五兵度支凡五曹晉置吏部三公客曹駕部屯田度支為六曹而無五  
兵及渡江有吏部祠部五兵左民度支五尚書宋齊梁各有六尚書又  
有起部尚書起部不常與立官廟則權置事畢省陳承梁置尚書五員  
後魏分尚書三十六曹七置代人令史譯令史書令史各一人隋改為  
六部尚書分司曹務直宿禁省如漢之制唐因隋制六典建官龍朔二  
年改尚書為太常伯咸亨元年依舊宋初監藩鎮之弊以尚書即曹出  
領外寄熙寧詔新官制以六曹尚書侍郎為長貳元祐置權尚書大元  
因唐宋舊置六部各以尚書為之長

**羣書要語**

帝曰龍朕聖說珍行震驚朕師命汝作納言夙夜出納朕  
命惟允尚書唯仲山甫王之喉舌詩士之權貴不過尚書漢  
官解詰尚上也言最在上總領之也釋名尚猶奉也百官言事當有案平

處奏之故曰尚書同上尚書尚事之本朕所責成也而應狹儉薄甚非治  
體康帝起居注漢明帝詔尚書蓋古之納言出納朕命機事不密則害成  
可不謹欵漢官儀天下樞要在於尚書章惠傳太宗謂戴胄曰尚書總因  
網維失一事天下有受其弊者戴胄傳漢置五曹今分六尚近喻喉舌遠  
譬斗樞隋江總表出納王命敷奏萬機蓋政令之所由宣選舉之所由定  
斯乃文昌天府隋百官志文昌政本司會要經况其五曹斯納百揆南史  
八座之任非賢莫居蔡謨疏臣聞尚書百揆堯萬機故天上尊北斗中  
樞陛下有南昌左轄柳子厚遜官表尚書職在機衡宮禁嚴密後即韻傳  
入作納言光輝紫極韋誕集影組文昌外簪清覽傅儀制獻善宣美揚雅  
歲綜事分務發揮政源魏志玉肅云

**尚書北斗尊**顏真卿集持衡留藻鑑聽履上星辰杜甫北斗司喉舌  
東方領縉紳赤管隨王命尚書踐台斗並同上尚書總庶事官人承  
法憲魏應據詩解組便歸閑處士折花莫笑病尚書歐公朝罷人人識鄭  
崇直聲如在履聲中東坡上方行賜尚書易路人不識呼尚書但見稟

雄千夫我如懷祖拙自謀正作尚書已過優並同上王述字懷祖與羲之  
齊名而羲之輕之尚書氣與秋天香社

**古今事實**

猶天喉舌

李固疏曰陛下有尚書猶天之北斗北斗為天喉舌尚書陛下之喉舌李  
固傳

擢任喉舌

後漢左雄虞詡上疏薦之曰雄有王臣蹇蹇之節宜擢任喉舌之官必有  
弼正之益由是拜尚書

試對第一

後漢崔酺時尚書有闕詔將大夫以上試對政事第一天文道術以第一  
者補之由是酺對第一拜尚書焉本傳

早拜九重

蔡景歷拜度支尚書舊武拜官在日午後景歷拜日適逢駕幸玄武觀在

位皆侍宴帝恐景歷不預特令早拜其見重如此

委以老成

晉山濤轉尚書表辭年老詔曰方今多事嘉謀良圖委以老成

帝喜得人

梁明少游知名之士位都官尚書簡文帝謂人曰我不喜明少游作尚書  
喜朝廷得人南史

典定舊制

伏湛字惠公拜尚書典定舊制袁宏漢書

閑練舊典

李固薦楊淮閑練舊典且有幹用宜在機密特拜尚書益部耆舊傳

明習舊事

王傅拜尚書明敏習漢家舊事分紀

明習故事

侯霸光武時拜尚書時無典故事朝廷又少近臣霸明習故事每春下寬

大之書奉四時之令官所建

典樞機霸

韋彪上疏曰欲急世所務當先除其患源在尚書典樞機天下事一決之不可私也華嶠後漢書

典樞機

尚書唐虞官也龍作納言詩云仲山甫王之喉舌秦改稱尚書漢亦尊此官典機密也漢官儀

即古六卿

魏世事統臺閣重內輕外故八座尚書即古六卿之任也衛盧久居斯位不忝厥職魏志

制法九品

陳羣為尚書制九品為官人之法同上

讜言正直

朱穆為尚書讜言正直謝承後漢

方毅廉貞

黃琬方毅廉貞為尚書續漢書

魏朗蹇諤

魏朗字少英入為尚書再升紫微蹇諤禁省不屈豪右謝承後漢書

荀緄寬敏

荀緄字伯條拜尚書緄性明寬敏於衆取以厲群僚秉機平正直道而行是時内外公卿大夫莫不敬憚同上

宜擇温厚

高馮正觀初上五事曰如尚書八座人之所責成者也宜擇温厚修潔者任之尚朴素華浮偽使家識老慈人知廉恥自然禮節具矣本傳

妙選德望

唐元宗欲用牛仙客為尚書張九齡諫曰不可尚書古之納言有唐以來多用舊相居之不然歷踐内外清貴之地妙選有德望者充之仙客本河湟一使典耳拔升清流齒班常伯此官邪也通鑑

舉觴見屬

後魏肅宗舉觴為群臣曰表尚書朕之杜預故以杯屬元凱侍坐者莫不仰羨北史

上疏薦拜

後左雄虞詡上疏薦之曰雄有王臣蹇上之節宜擢任喉舌之官由是拜尚書

佩刀簪筆

尚書佩契刀囊執板加簪筆焉袁子正書又周捨問劉杳尚書官著紫荷

相傳云挈囊竟何所出荅云張安世傳云囊簪筆事武帝數十年注云囊

橐也近臣簪筆以待顧問南史

班詔賜珠

顯宗拜鍾離意為尚書時交趾太守張恢坐藏千金徵還伏法以資物簿入大司農詔班賜群臣意得珠璣悉以委地而不拜賜帝怪而問其故對曰孔子忍渴於盜泉之水曾子回車於勝母之門惡其名也此臧穢之寶

誠不敢拜帝嗟歎曰清乎尚書之言乃更以庫錢三十萬賜意轉為尚書

僕射後本傳

鄭崇履聲

前漢鄭崇字子游為尚書僕射數諫諍上納用之每見曳革履上笑曰我

識鄭尚書履聲本傳

杜預武庫

杜預為尚書損益萬機不可勝數朝野代焉號曰杜武庫言其無所不有王隱晉書

叱梁異帶劍

後漢張陵字彪仲為尚書省歲朝梁異帶劍入省陵叱異令出敕虎賁奪其劍有僚肅然莫弟不疑曾舉陵孝廉謂曰昔之宰君所以自罰也陵曰今申公憲以報私恩本傳

呵虎賁置弓

朱穆拜尚書正月百官朝賀畢虎賁當陛下置弓於地曰此天子弓誰敢



干越穆乃呵之曰天子弓當載之有首之上乃敢置地大不敬即收虎賁  
付詔獄治罪莫不肅然 張璠漢記

古今文集

雜著

上李實尚書

韓愈

愈來京師於今十五年所見公卿大臣不可勝數皆能守官奉職無過失  
而已未見有赤心事上憂國如家如閣下者今年已來不雨者有有餘日  
種不入土野無青草而盜賊不敢起穀價不敢貴百坊百二十司六軍二  
十四縣之人皆若閣下親臨其家老姦宿賊銷縮摧沮鬼亡鬼喪影滅跡  
絕非閣下條理鎮服布宣天子威德其何能及此

謝襄陽李夷簡尚書撫問啓

柳宗元

其啓當州負外司馬李幼清傳示尚書委曲特賜記憶過蒙存問捧讀喜  
懼浪然流涕慶幸之深出自望外伏惟尚書鸞立朝端風行天下入統邦  
憲出司主憂控此上游式是南服凡海內奔走之士思欲修容於轅門之

外躡履於油幢之前警之涉蓬瀛登崑閬不可得而進也其負罪淪伏声  
銷跡滅固世俗之所棄親友之所遺敢希大賢曲見存念是以展轉歎歎  
晝詠宵丹願為斯役以報恩遇瞻仰霄漢邈焉無由網羅未解縱羽異而  
何施囊檻方堅雖虎豹其焉往不任踊踴懇懇之至謹奉啓起居輕驥威  
嚴倍增戰越

上河陽烏尚書欲獻文啓

柳宗元

伏以尚書以碩德偉才代著勲烈兩河定亂三城建功鼎鑿竹帛未足云  
紀進臨汝上控制東方隱然長城朝野倚賴宗元雖屏棄遐壤而飽聞德  
声所恨不獲親執鞭弭以備戎伍夙夜踴躍不先寧居伏以威稜所加狂  
狡已震莫大之績重復增崇小子久以文字進身嘗好古人事業專當具  
筆札拂縑紉贊揚大功垂之不朽瞻望霄漢恋慕交深冒驥威嚴伏增戰  
越

律詩

多病執執奉懷李尚書

杜甫

衰年正苦病侵凌首夏何須氣鬱蒸大水森茫炎海接奇峯碑兀火雲昇  
思霽道曠黃梅雨敢望宮恩王井水不是尚書期不顧山陰野雪與難乘  
暮春陪李尚書過鄭監湖亭汎舟得過字 杜甫  
海內文章伯湖邊意緒多玉樽移晚興桂楫帶酣歌春日繁魚鳥江天足  
羨荷鄭莊賓客地衰白遠來過

送李遜尚書赴襄陽八韻

韓退之

帝憂南国切改命付忠良壤畫星搖動旗分獸歛揚五營兵轉肅千里地  
還方控帶荆門遠飄浮漢水長賜書寬屬郡戰馬隔鄰疆縱獵雷霆迅觀  
其玉石忙風流峴首客花艷大堤倡富貴由身致誰教不自強

總侍郎

歷代沿革

初秦置侍郎無負分隸三署主執戟侍宮殿出則充車騎漢  
因之侍郎秩四百石以其為即內侍故曰侍郎侍郎六卿之  
副凡諸郎掌更直執戟宿衛諸殿門以侍衛之故通謂之侍郎武帝時

東方朔為即後揚雄為侍郎當時謂之官不過侍郎位不過執戟是也  
尚書亦有侍郎初入其臺稱即中滿歲稱侍郎即尚書郎入其臺功高者轉  
為侍郎隋煬帝二年尚書六曹各置侍郎一人以貳尚書之職並正第  
四品今之侍郎其置自此始又改諸司侍郎但曰郎吏部為選部郎禮  
部為儀曹郎兵部為兵曹郎刑部為憲曹郎工部為起曹郎以異六侍  
郎之名唐武德六年廢六司侍郎貞觀二年復又降為正四品下惟吏  
部侍郎為正四品上咸亨元年復為侍郎總章元年吏部兵部各增侍  
郎一員宋以為階官至元豐官制行始有職掌元祐二年初置權侍郎  
從四品如未歷給事中中書舍人及待制以上者並帶權字祿賜比諫  
議大夫崇寧罷權侍郎建炎四年復置大元仍之置六部侍郎

羣書彙語

位不過侍郎權總統給事黃門 楊雄解嘲 周歷五曹之副建明

萬事之本中臺政本思率舊章六卿貳職今之盛選 冊府元  
龜序文昌貳卿位次八座東坡除陸佃制六卿之副百工牧唐制侍郎掌

貳令之職朝廷大政參議焉臨軒冊命為使則持冊書授之四夷來朝則

授其表疏而奏之獻贊幣則受以付有司唐百官志侍郎自皇朝以來為衣冠之華遠自非履歷清要望實具美者无以居之類要侍郎三十六人四百石一曹有六人主作文書起草後百官志

**詩曰**客曾與天遠出入清禁中李白召登金華省我入銀臺門同上登臨憶得即杜三賢惟侍從韓榮傾鄒枚韓侍從近臣有虛位公今此去何時

歸 幸得復中氣天從拂天振 紅旗照海壓南荒徵入臺中作侍郎並

同上響切晨趨佩煙濃近侍香柳邊游侍從臣左右天子顧六一集五殿

清霜綴曉班 晚登玉墀侍珠旒並同上 與君持橐侍惟隆同到溫室觀

堯真東坡紫府侍臣鳴玉佩山谷大似不蒙稽古力至今猶看侍臣冠田

**古今事實**

閑達故事

後漢陽球字方正為尚書侍郎閑達故事章奏處議為其臺閣所崇信本傳

彌綸舊章

謝承父嬰為尚書侍郎伏事丹墀彌綸舊章謝承後漢書

尚德之舉

侍郎官重尚德之舉顏直當之魏愈幸幸顏自代狀

**古今文集**

雜著

薛左丞謝除門下侍郎表

汪藻

久參帷幄方俟黜幽進武裁機處切圖舊莫張已成之命唯深非據之憂

席寵過隆撫躬何幸中謝伏念臣卑從孤遠遭值聖明少誦師言每信書

而達俗晚陪國論重充位以妨賢蒙端鑒之誤知保孤衷而平進肆竭股

肱之力何施毫髮之功豈伊白首之衰晚堪此黃扉之重任雖緣人之實

玷詔除茲蓋伏遇 皇帝陛下剛健粹精聰明齊聖疏通萬物之理灼見

群臣之心猥憐樸樸之無他擢處周行之至要第崇資顯秩當收有用之

材方治世昌辰尤急可觀之效誓勤鞭策力振綱維與多士以同寅上承

休德殞百身而圖報敢愛餘生

律詩

寄鄭侍郎

王介甫

兩朝人物嘆賢豪  
清風晚見褒  
江漢但歸滄海闊  
丘陵難奈泰山高  
放懷詩酒機先息  
回首功名世自勞  
久願作公樽俎客  
恨無三畝蘄蓬蒿

送張侍郎

韓愈

司徒東顧馳書謁丞相  
西來走馬迎兩府  
元臣今轉密  
一方逋寇不難平

寄王侍郎

杜甫

何限倚山才  
吟詩秋葉黃  
蟬聲集古寺  
烏影度寒塘  
風物悲遊子  
登臨憶侍郎  
老夫貪佛日  
隨音宿僧房

# 總郎中

## 歷代沿革

初秦置郎中令其屬官有二署五官中郎將左中郎右中郎  
將凡三署上中有郎中每員多至千人分隸三署主執戟侍  
宮殿出則充車騎漢因之郎中之名猶因三署本號置尚書郎四人分  
掌尚書事時馮唐為郎中署長光武分尚書為六曹每一人尚書則領

六郎凡三十六郎自漢以來尚書諸曹郎中侍郎或不兩置  
魏自黃初改秘書為中書置通事郎掌詔草而尚書郎有二十三人非復漢時職  
任晉宋唯置郎中梁陳兩置後魏北齊唯置郎中隋以諱忠不置郎  
中煬帝改曰郎改郎為郎中龍朔二年改為大夫咸亨光宅神龍並  
隨曹改復宋元豐官制行郎官理郡守以上資任者為郎中郎中員外  
郎亦自為兩等頗自履歷而授之後來相承必欲以闕升知州資序為  
郎中於是拜員外者具改官實歷歲月申吏部不以若干任但通理細  
滿八考則陞知州乃作正郎別命詞給告常有旨初除郎官雖資歷已  
高且為員外郎候吏部再申然後陞作郎中  
大元六部各置郎中

## 羣書要語

舊選尚書郎極清望也  
山濤啟事  
鄧遐有才義論者以為宰  
士之俊宜用為郎  
同上  
臺即皆朝之俊選當足處事宜辨正

疑滯也  
裴度奏  
今以劣弱之質任督責之官以無用之才管繁劇之任且  
其臺即清顯論望宜充者  
郭璞表  
草奏即吏之選必資時秀  
元和制詔  
宜序  
天臺之屬  
同上  
濫跡星署  
我類  
發揮草臺  
又參奏議頗練朝章宜從滿

歲之迂俾轉分曹之次處以彌綸之職當茲俊茂之選 宜正列星之次

俾承賜筆之寵省理辨疑時稱簡達 高選髦士以分劇曹並同上優遊

省闈珥筆華軒潘岳贈陸機握蘭建禮總即官劉孝儀為江僕射薦士表

翔于即署韓文叨陪錦帳坐漢百官志往自星即爰秉天憲揚國忠制嘉

乃令子為吾望即元徽之行韋審規父漸制即官古之元士天下之務多

所關決其於損益大矣常衮制虞詡曰臺即顯職乃筮仕之通階職類臺

即御史邦之俊茂若出宰牧守頌聲興矣晉起居注晉尚書即選極清美

號為大臣之副通典

**詩句**即官清要為世稱韓愈未貞行馨香粉署妍杜為是先帝白髮即東

坡雞舌還應共賜香 君為尚書即坐擁百吏繁 東川得望即坐與西

爭重並同上喜得廊廟奉嗟為臺閣分遠從南斗外遙仰列星文蘇味道

即官有錦帳杜

**古今事實**

含香握蘭

尚書即伏奏事黃門即對揖跪受故稱尚書即懷香握蘭趨走丹墀應邵

漢官儀又尚書即口含雞舌香以其奏事答對欲使氣息芬芳也宋百官

作文起草

尚書即主作文書起草書夜更直五日於建禮門外漢官儀

粉署丹墀

粉署即署也以諸郎官握蘭含香故云含香又謂之登省以粉登之故言

粉署又省中皆以胡粉塗壁益古賢烈士以丹朱漆地故謂之丹墀通典

青縑白被

尚書即入直官給青縑白綾被或以錦被給帷帳茵褥通中枕太官供食

物湯官供餅餌及五熟果實之屬五日一美食下天子一等漢官儀

對青瑣

黃門即日夕入對青瑣門拜同上

月賜筆墨

漢尚書即月賜赤管大筆一雙逾麋墨一九通典

獨宿臺上

黃香為尚書即常獨止宿臺上晝夜不離省闈帝聞而善之類要

常伏省下

馮豹為尚書即每奏事未報常伏省下或自昏至明天子默使人持被覆之摯虞三輔史錄

太微積星

後漢楊秉疏太微積星名為即位入奉宿衛出宰百里

太微後星

太微後二十五星即位也史記

一曰依烏

即位十五星在帝位東北一曰依烏即府也三省郎中是其職也晉天文志

號三列宿

韋湊祖叔諧正觀中為康部郎中與弟吏部郎中叔謙兄主爵郎中季武同省特號三列宿

拜舉孝廉

胡廣舉孝廉為天下第一旬月拜尚書郎恪勤職事所掌兼治兩曹續漢書魏武集選舉令云國家舊法選尚書即以取孝廉也

詔選清白

安帝元初六年詔中郎將選孝廉郎寬博有謀清白行高者出補令丞尉後漢記

容儀端正

田鳳字季宗為尚書即容儀端正入奏事靈帝目送之因題柱曰堂上乎

張京兆田郎三輔決錄

威容可視

杜軫為尚書即威容可視華陽國志

皆須稱職

永昌五年勅六官分事四方取則尚書即皆是妙選須稱職司馬馬唐會要

不可賞能

開成四年益鉄推官姚勗鞫問河陰黠吏得實除職方員外郎右丞韋溫  
上疏以郎官朝廷之清選不可以賞能吏續通典

豈即才邪

李林甫源乾曜執政乾曜子潔為林甫求司門郎中乾曜素薄之曰郎官  
應得才望哥奴豈即中才邪哥奴林甫小字也同上

至即足矣

孔若思勸李擢明經歷庫部郎中嘗曰仕宦至郎中足矣座右置水一石  
明自足意同上

自起撞郎

明帝性褊察常以事怒即藥崧以杖撞之崧走入床下帝甚怒疾言曰郎  
出即出崧曰天子繆上諸侯皇上未聞人君自起撞郎帝赦之鍾芳意傳

皆主更直

五官中郎將一人主五官郎五官郎中無負凡郎官皆主更直執戟衛諸  
殿門後百官志

襍被逕出

魏舒為尚書即時郎選或有非其人者論者欲沙汰之舒曰吾即其人也  
襍被逕出同僚素無清論咸有愧色談者莫不詠其高晉本傳

給帳入直

尚書郎入直官給帷帳氈褥侍史二人選端正妖麗執香炉護衣服奏事  
明光殿宋百官志

職典樞機

徐防補尚書郎職典樞機周密畏謹奏事三世未嘗有過云類要  
才堪廊廟

索靖字緄字巨秀少有逸羣之量靖每曰廊廟之才非簡札之用州郡吏  
不足汗吾兒也舉秀才除郎中晉書

白首郎署

馮唐以孝廉著為郎中署長白首屈於郎荀悅漢紀

一家郎官

韋虛心父子兄弟更踐即署時祔即官家舊唐書

披覩青天

樂廣為尚書即與何晏鄧颺等談講衛瑾見而奇之曰常恐微言將絕今復聞之命諸子造焉謂曰人之水鑑也每見此人瑩然如披雲霧而覩青天也王隱晉書

上應列宿

後漢館陶公主為子求郎不許明帝謂羣臣曰郎官上應列宿出宰百里本紀

馮勤佳吏

馮勤除為郎中每引進帝顧左右曰佳乎吏也移本傳

趙華高名

趙華早擅高名在官途五十年累經貶謫蹇躓備至入仕三十年方露省官

古今文集

古詩

天星送楊凝郎中賀正

韓昌黎

天星牢落雞喔咿僕夫起餐車載脂正當窮冬寒未已借問君子行安之會朝元正無不至受命上宰須及期侍從近臣有虛位公今此去歸何時

和趙郎中捕蝗韻

蘇子瞻

麥穗人許長穀苗牛可沒天公獨何意忍使蝗虫發驅攘若令典農事安可忽我僕既胼胝我馬亦欵斫飛騰漸云少筋力亦已竭苟無百篇詩何以醒睡兀初如䟽吠澮漸若决澌渤往來供十吏平生輕妄庸熟視笑魏勃愛君有逸氣詩壇專斬伐民病何時休吏職不可越慎無及世事向空書咄咄

送陸郎中

錢起

事邊仍恋主奉酒復悲歌粉署含香別轅門載筆過鶯聲出漢苑柳色過漳河相憶情難盡離居春草多



送致政朱郎中東歸

王介甫

平生不省問田園白首忘懷道更尊已上印書辭北闕稍留冠蓋餞東門  
馮唐老有為郎亦疎廣終無任子恩今日祭婦人所羨兩兒腰綬擁高軒  
喜李侍御拜郎官入省  
錢起

粉署花驄入丹霄紫誥垂直廬驚鷲漏近賜被蒼霜移漢主前瑶席襍侯許  
鳳池應怜後行鴈空羨上林枝

聞崔馬並拜臺郎

蘇味道

振鷺齊飛日遷鶯遠聽聞明光共待漏清覽各披雲喜得廊廟舉嗟為臺  
閣分遠從南斗外遙仰列星文

南省伴直

韋莊

文昌二十四仙曹盡倚紅簷種露挑一洞煙霞人迹少六行槐柳馬嘶高  
星分夜彩寒侵帳蘭惹春香綠映袍何事愛留詩客宿滿庭風雨竹蕭騷

賀楊十二新拜省郎

白樂天

文昌新入有光輝紫界宮牆白粉闌曉日雞人傳漏箭春風侍女護朝衣

省中即事

岑參

華省謬為郎蹉跎鬢髮已蒼到來還襍被隨例且含香

嘲趙郎中

賀遂涉

貧外由來美郎中望不優寧知粉署裏翻作土山頭

# 總負外郎

## 歷代沿革

**晉**尚書省置負外郎分判曹事**隋**開皇三年尚書置二十四  
司各置負外郎一人謂本負之外復置即也掌其曹之版籍

侍郎闕則釐其曹事此今負外郎所由始也通典注歷代尚書郎各以

普名為稱首或謂之侍郎皆無負外之號前代文傳及職官要錄或有  
言負外郎者蓋謂負外郎散騎侍郎耳非尚書之職也

煬帝三年每司

減一即置承務郎一人同開皇負外之職**唐**尚書諸曹各置負外吏部

置二人龍朔咸亨光宅並隨改復**宋**元豐官制六曹郎官理郡守以上

資任者郎中通判以下資序者為負外郎雖理知州資序未曾實歷知

州及監司開封府推判官者止除負外郎(大元)六部各置負外郎

**羣書要語**

任外郎之負承諸曹之務胡文恭行王積制陟中臺之局寘副郎之職王鼎制俾升文昌用副郎選公是行雍明遠制

**古今事實**

散郎

外郎散郎也漢惠帝純注

副郎

韋侯以考功副郎守盛山韓文盛山十二詩序

彌重其選

負外郎唐朝彌重其選通典

司皆其選

職負令二十四司皆其選也

**古今文集**

律詩

和王負外晴雪早朝

鄭谷

紫微晴雪帶恩光  
繞仗偏隨鴛鴦行  
長信月留寧避曉  
宜春花雨不飛香  
獨看積素凝清禁  
已竟輕寒讓太陽  
題柱盛名兼絕唱  
風流誰繼漢田郎

送鄭負外

韓翃

風流不減杜陵時  
五十為郎未是遲  
孺子亦知名  
下士樂人爭唱卷中詩  
身齊吏部還多醉  
心顧尚書自有期  
要路眼看知  
已在不應窮巷久  
祗眉

同錢負外禁中夜直

白居易

宮漏三聲知夜半  
好風涼月滿松筠  
此時閑坐寂無語  
藥樹影中唯兩人  
聽水部吳負外新詩

白居易

朱紱仙郎白雪歌  
和人雖小愛人多  
明朝與向詩家道  
水部如今不姓何



